

舊
五
代
史

四



舊五代史卷十八

宋司空同中書門下平章事薛居正等撰

列傳第八

梁書十八

張文蔚字右華河間人也父楊

案楊原本作錫考舊唐書張楊傳云字公表當

以從衣為是今改正

唐僖宗朝累為顯官文蔚幼礪文行求知取

友藹然有佳士之稱唐乾符初登進士第時丞相裴坦

兼判鹽鐵解褐署巡官未幾以畿尉直館丁父艱以孝

聞中和歲僖宗在蜀大寇未滅急于軍費移鹽鐵于揚

州命李都就判之奏為轉運巡官駕還長安除監察御

史遷左補闕侍御史起居舍人司勳吏部員外郎拜司

勳郎中知制誥歲滿授中書舍人丁母憂退居東畿哀毀過禮服闋復拜中書舍人俄召入翰林爲承旨學士屬昭宗初還京闕皇綱寢微文蔚所發詔令靡失厥中論者多之轉戶部侍郎仍依前充職尋出爲禮部侍郎天祐元年夏拜中書侍郎平章事兼判戶部時柳璨在相位擅權縱暴傾陷賢儁宰相裴樞等五家及三省而下三十餘人咸抱冤就死縉紳以日不敢竊語其是非餘怒所注亦不啻十許輩文蔚殫其力解之乃止士人賴焉璨敗死文蔚兼度支鹽鐵使天祐四年天子以土運將革天命有歸四月命文蔚與楊涉等總率百寮奉

禪位詔至大梁太祖受命文蔚等不易其位開平二年

春暴卒于位詔贈右僕射文蔚沉邃重厚有大臣之風

居家孝且悌雖位至清顯與仲季相雜在太夫人膝下

一不異布素弟濟美早得心恙案舊唐書云文蔚弟濟美貽憲相繼以進士登

第北夢瑣言云張昺尚書有五子文蔚彝憲濟美仁龜皆有名第至宰輔丞郎內一子亡其名少年間壁魚食

神仙字身有五色吞之可得仙因欲試之遂致心疾是得疾者別自一人非濟美也文蔚撫視殆

三十年士君子稱之子鑄周顯德中位至祕書監永樂大典

卷六千三百五十一

薛貽矩字熙用河東聞喜人祖存父廷望咸有令名貽

矩風儀秀聳其與游者皆一時英妙藉甚于文場間唐

乾符中登進士第歷度支巡官集賢校理拾遺殿中起居舍人召拜翰林學士加禮部員外郎知制誥轉司勳郎中其職如故乾寧中天子幸石門貽矩以私屬相失不及于行在罷之旋除中書舍人再踐內署歷戶部兵部侍郎學士承旨及昭宗自鳳翔還京大翦闕寺貽矩尚爲韓全誨等作畫贊悉紀于內侍省屋壁間坐是謫官天祐初除吏部侍郎不至太祖素重之嘗言之于朝卽日拜吏部尙書俄遷御史大夫四年春唐帝命貽矩持詔赴大梁議禪代之事貽矩至盛稱太祖功德請就北面之禮太祖雖謙抑不納待之甚厚受禪之歲夏五

月拜中書侍郎平章事兼判戶部明年夏進拜門下侍

郎監修國史判度支又遷弘文館大學士充鹽鐵轉運

使累官自僕射至守司空在任綿五載

案歐陽史梁本紀貽矩以開平

元年同平章事至乾化二年薨統計貽矩居相位共六年歐陽史唐六臣傳貽矩為唐相五年卒尚仍薛史之

誤然亦無顯赫事跡可紀扈從貝州還染時癘旬日卒

于東京詔贈侍中

永樂大典卷二萬一千三百六十七

張策字少逸燉煌人父同仕唐官至容管經略使策少

聰警好學尤樂章句居洛陽敦化里嘗浚甘泉井得古

鼎耳有篆字曰魏黃初元年春二月匠吉千且又製作

奇巧同甚寶之策時在父傍徐言曰建安二十五年曹

公薨改年爲延康其年十月文帝受漢禪始號黃初則是黃初元年無二月明矣鼎文何謬歟同大驚亟遣啓書室取魏志展讀一不失所啟宗族奇之時年十三然而妙通因果酷奉空教未弱冠落髮爲僧居雍之慈恩精廬頗有高致唐廣明末大盜犯闕策遂返初服奉父母逃難君子多之及丁家艱以孝聞服滿自屏郊藪一無干進意若是者十餘載方出爲廣文博士改祕書郎王行瑜帥邠州辟爲觀察支使帶水曹員外郎賜緋及行瑜反太原節度使李克用奉詔討伐行瑜敗死邠州平策與婢肩輿其親南出邠境屬邊寨積雪爲行者所

哀太祖聞而嘉之奏爲鄭滑支使尋以內憂去職制闕
除國子博士遷膳部員外郎不一歲華帥韓建辟爲判
官及建領許州又爲掌記天復中策奉其主書幣來聘
太祖見而喜曰張夫子且至矣卽奏爲掌記兼賜金紫

案北夢瑣言云朱令公軍次于華用張濬計先取韓建
其幕客張策攜印率副使李巨川同詣轅門請降張策
本與張濬有分攜印而降協濬之謀是
梁祖之喜張策由張濬有先入之言也天祐初表其才

拜職方郎中兼史館脩撰俄召入爲翰林學士轉兵部
郎中知制誥依前脩史未幾遷中書舍人職如故太祖
受禪改工部侍郎加承旨其年冬轉禮部侍郎明年從
征至澤州拜刑部侍郎平章事仍判戶部尋遷中書侍

郎以風恙拜章乞骸改刑部尙書致仕卽日肩輿歸洛
居于福善里修篁嘉木圖書琴酒以自適焉乾化二年
秋卒所著典議三卷制詞歌詩二十卷牋表三十卷存
于其家

永樂大典卷六
千三百五十一

杜曉字明遠京兆杜陵人祖審權仕唐位至宰相父讓
能官至守太尉平章事乾寧中邠鳳二鎮舉兵犯王畿
讓能被其誣陷天子不得已賜死于臨臯驛曉居喪柴
立幾至滅性憂滿服幅巾七升沈跡自廢者將十餘載
光化中宰相崔胤判鹽鐵奏爲巡官兼校書郎尋除畿
尉直弘文閣皆不起及昭宗東遷宰相崔遠判戶部又

奏爲巡官兼殿中丞或語之日稽中散死子紹埋沒不自顯山濤以物理勉之乃仕吾子忍令杜氏歲時以鋪席祭其先人同匹庶乎曉乃就官未幾拜左拾遺尋召爲翰林學士轉膳部員外郎依前充職及崔遠得罪出守本官居數月以本官知制誥俄又召爲學士遷郎中充職太祖受禪拜中書舍人職如故開平三年轉工部侍郎充承旨明年秋拜中書侍郎平章事仍判戶部庶人友珪篡位遷禮部尙書平章事集賢殿大學士依前判戶部及袁象先之討友珪禁兵大縱曉中重創而卒末帝卽位詔贈右僕射曉博瞻有詞藻時論稱之兄光

父案新唐書表
光父字啟之

有心疹厥疾每作或溢喙縱詬或揮挺

追撲曉事之愈恭未嘗一日少怠居兩制之重祖述前

載甚得王言之體

案北夢瑣言云曉貌
如削玉有制誥之才

及典秩尙書志

氣甚遠一旦非分而沒咸寃惜焉豈三世爲相道忌太

盛歟

永樂大典卷一萬
四千七百三十

敬翔字子振同州馮翊人唐神龍中平陽王暉之後也

曾祖琬綏州刺史祖忻同州掾父袞集州刺史翔好讀

書尤長刀筆應用敏捷乾符中舉進士不第及黃巢陷

長安乃東出關時太祖初鎮大梁有觀察支使王發者

翔里人也翔往依焉發以故人遇之然無由薦達翔久

五代史卷一百一十五 王

之計窘乃與人爲牋刺往往有警句傳于軍中太祖比不知書章檄喜淺近語聞翔所作愛之謂發曰知公鄉人有才可與俱來及見應對稱旨卽補右職每令從軍翔不喜武職求補文吏卽署館驛巡官俾專掌檄奏太祖與蔡賊相拒累歲城門之外戰聲相聞機略之間翔頗預之太祖大悅恨得翔之晚故軍謀政術一以諮之蔡賊平奏授太子中允賜緋從平兗鄆改檢校水部郎中太祖兼鎮淮南授揚府左司馬賜金紫乾寧中改光祿少卿充職天復中授檢校禮部尙書遙領蘇州刺史昭宗自岐下還長安御延喜樓召翔與李振登樓勞問

翔授檢校右僕射太府卿賜號迎鑾叶贊功臣太祖受
禪自宣武軍掌書記前太府卿授檢校司空依前太府
卿勾當宣徽院事尋改樞密院爲崇政院以翔知院事
開平三年夏四月太祖以邠岐侵擾遣劉知俊西討鄜
延深憂不濟因宴顧翔問以西事翔剖析山川郡邑虛
實軍糧多少悉以條奏如素講習左右莫不驚異太祖
歎賞久之乾化元年進位光祿大夫行兵部尙書金鑾
殿大學士知崇政院事平陽郡侯前朝因金鑾坡以爲
門名與翰林院相接故得爲學士者稱金鑾以美之今
殿名金鑾從嘉名也置太學士始以翔爲之

案五代會
要云以金

鑿爲名非典也大學士與三館大學士同翔自釋褐東下遭遇霸王懷抱深

沉有經濟之略起中和歲至鼎革大運其間三十餘年

扈從征伐出入帷幄庶務叢委恒達旦不寢唯在馬上

稍得晏息每有所裨贊亦未嘗顯諫上俛仰顧步間微

示持疑爾而太祖意已察必改行之故裨佐之迹人莫

得知及太祖大漸召至御牀前受顧託之命且深以并

寇爲恨翔嗚咽不忍受命而退案通鑑乾化二年六月

珪爲萊州刺史卽命之官已宣旨未行勅蓋卽敬翔所

受之命戊寅太祖被弑命未及行故薛史亦不爲詳載庶人友珪之篡位也以天下之望命翔爲宰相友珪以

翔先朝舊臣有所畏忌翔亦多稱病不綜政事末帝卽

位趙張之族皆處權要翔愈不得志及劉鄩失河朔安
彥之喪楊劉翔奏曰國家連年遣將出征封疆日削不
獨兵驕將怯亦制置未得其術陛下處深宮之中與之
計事者皆左右近習豈能量敵之勝負哉先皇時河朔
半在親御虎臣驍將猶不得志于敵人今寇馬已至鄆
州陛下不留聖念臣所未諭一也臣聞李亞子自墨獫
統衆于今十年每攻城臨陣無不親當矢石昨聞攻楊
劉率先負薪渡水一鼓登城陛下儒雅守文未嘗如此
俾賀瓌輩與之較力而望遠逐寇戎臣所未諭二也陛
下所宜詢于黎老別運沉謀不然則憂未艾也臣雖驚

怯受國恩深陛下必若乏材乞于邊陲効試末帝雖知其懇惻竟以趙張輩言翔怨望不之聽及王彥章敗于中都晉人長驅而南末帝急召翔至謂之曰朕居常忽卿所奏果至今日事急矣勿以爲懟且使朕安歸翔泣奏曰臣受國恩僅將三紀從微至著皆先朝所遇雖名宰相實朱氏老奴耳事陛下如郎君以臣愚誠敢有所隱陛下初任段凝爲將臣已極言小人朋附致有今日晉軍卽至段凝限水欲請陛下出居避狄陛下必不聽從欲請陛下出奇應敵陛下必不果決縱良平復生難以轉禍爲福請先死不忍見宗廟隕墜言訖君臣相向

慟哭及晉主陷都城有詔赦梁氏臣寮李振謂翔曰有制洗滌將朝新君翔曰新君若問其將何辭以對是夜翔在高頭里第宿于車坊欲曙左右報曰崇政李太保已入朝翔返室嘆曰李振謬爲丈夫耳朱氏與晉仇讎我等始同謀畫致君無狀今少主伏劍于國門縱新朝赦罪何面目入建國門也乃自經而卒數日并其族被誅初貞明中史臣李琪張袞郟殷象馮錫嘉奉詔修撰太祖實錄三十卷敘述非工事多漏略復詔翔補緝其闕翔乃別纂成三十卷目之曰大梁編遺錄與實錄偕行翔妻劉氏父爲藍田令廣明之亂劉爲巢將尙讓所

得巢敗讓攜劉降于時溥及讓誅時溥納劉于妓室太祖平徐得劉氏嬖之屬翔喪妻因以劉氏賜之及翔漸貴劉猶出入太祖卧內翔情禮稍薄劉于曲室讓翔曰卿鄙余曾失身于賊耶以成敗言之尙讓巢之宰輔時溥國之忠臣論卿門第辱我何甚請從此辭翔謝而止

之劉恃太祖之勢

案原本下有缺文

太祖四鎮時劉已得國夫

人之號車服驕侈婢媵皆珥珠翠其下別置爪牙典謁

書幣聘使交結藩鎮近代婦人之盛無出其右權貴皆

相附麗寵信言事不下于翔當時貴達之家從而效之

敗俗之甚也

永樂大典卷一萬八千四百二十四五
代史補敬翔應三傳數舉不第發憤投太

祖願備行陣太祖問曰足下通春秋久矣今吾主盟其
爲戰欲效春秋時可乎翔曰不可夫禮樂猶不相沿襲
况兵行詭道宜其變化無窮若復如春秋時則所謂務
虛名而喪其實效大王之事去矣太祖大悅以爲知兵
遽延之幕府委以
軍事竟至作相

李振字興緒唐潞州節度使抱眞之曾孫也祖父皆至
郡守振仕唐自金吾將軍改台州刺史會盜據浙東不
克之任因西歸過汴以策略干太祖太祖奇之辟爲從
事太祖兼領鄆州署天平軍節度副使湖南馬殷爲朗
州雷滿所逼振奉命馳往和解殷滿皆稟命光啟三年
十一月太祖遣振入奏于長安舍于州邸邸吏程巖白
振曰劉中尉命其姪希貞來計大事欲上謁願許之旣

至巖乃先啟曰主上巖急內官憂恐左中尉欲行廢黜
之事巖等協力以定中外敢以事告振顧希貞曰百歲
奴事三歲主亂國不義廢君不祥非敢聞也况梁王以
百萬之師匡輔天子禮樂尊戴猶恐不及幸熟計之希
貞大沮而去案通鑑考異疑李振之拒希貞為誤謂李
振若已立異豈敢復入長安與崔胤謀反
正乎今考梁祖紀亦云李振自長安使迴當時季述懼
汴梁兵力固不能阻李振之往來薛史所書宜可徵信
及振復命劉季述等果作亂程巖率諸道邸吏牽帝下
殿以立幼主奉昭宗為太上皇振至陝陝已賀矣護軍
韓彝範言其事振曰懿皇初昇遐韓中尉殺長立幼以
利其權遂亂天下今將軍復欲爾耶彝範即文約孫也

由是不敢言振東歸太祖方在邢洛遽還于汴大計未
 決李述遣養子希度以唐之社稷欲輸于太祖又遣供
 奉官季奉本副介支彥勳詐贖上皇誥諭至皆季述黨
 也太祖未及迎命振又言曰夫豎刁伊戾之亂所以資
 霸者之事也今闔豎幽辱天子不能討無以令諸侯時
 監軍使劉重楚季述兄也舊相張濬寓于河南緱氏亦
 來謂太祖曰同中官則事易濟且得所欲唯振堅執不
 改獨曰行正道則大勳可立太祖英悟忽厲色曰張公
 勸我同敕使欲傾附自求宰相耶

案舊唐書昭宗紀崔胤與前左僕射張濬

告難于全忠張濬傳亦云德王廢立之際濬致書諸藩請圖匡復薛史作張濬黨于季述為梁祖所拒與舊唐

書

乃定策繫僞使李奉本支彥勳與希度等卽日請振將命于京師與宰相謀反正未幾劉季述伏誅昭宗復帝位太祖聞之喜召振執其手謂之曰卿所謀是吾本志穹蒼其知之矣自是益重之天祐二年春正月太祖召振謂曰王師範來降易歲尙處故藩今將奏請徙授方面其爲我馳騎以茲意達之振至青州師範卽日出公府以節度觀察二印及文簿管鑰授于振師範雖已受代而疑撓特甚屢揮泣求貸其族振因以切理論之曰公不念張繡事耶漢末繡屢與曹公立敵豈德之耶及袁紹遣使招繡賈詡曰袁家父子自不相容何能主

天下英士曹公挾天子令諸侯其志大不以私讐爲意
不宜疑之今梁王亦豈以私怨害忠賢耶師範洒然大
悟翌日以其族遷太祖乃表振爲青州留後未幾徵還
唐自昭宗遷都之後王室微弱朝廷班行備員而已振
皆頤指氣使旁若無人朋附者非次獎升私惡者沉棄
振每自汴入洛朝中必有貶竄故唐朝人士目爲鴟梟
天祐中唐宰相柳燦希太祖旨譖殺大臣裴樞陸扆等
七人於滑州白馬驛時振自以咸通乾符中嘗應進士
舉累上不第尤憤憤乃謂太祖曰此輩自謂清流宜投
于黃河永爲濁流太祖笑而從之洎太祖受禪自宣義

軍節度使檢校司徒授殿中監累遷戶部尙書庶人友
珪篡立代敬翔爲崇政院使末帝卽位趙張二族用事
遂爲所間謀猷猷替多不見從振每稱疾避事龍德末
閑居私第將暮矣晉主人汴振謁見首罪郭崇韜指振
謂人曰人言李振乃一代奇才吾今見之乃常人耳會
段凝等疏梁氏權要之臣振與敬翔等同日族誅

永樂大典

卷一萬三
百八十一卷

史臣曰文蔚貽矩皆唐朝之舊臣遇梁室之強禪奉君
命以來使狎神器以授之逢時若斯亦爲臣者之不幸
也抑不爲其相不亦善乎杜曉著文雅之稱張策有冲

淡之量咸登台席無忝士林敬翔李振始輔霸圖終成
帝業及國之亡也一則殞命以明節一則視息以偷生
以此較之翔爲優矣振始有濁流之言終取赤族之禍

報應之事固以昭然

永樂大典卷一
萬三百八十八

舊五代史卷十八終

舊五代史卷十八攷證

張策傳父同仕唐至容管經略使 父同唐摭言作父

同文歐陽史與是書合今仍之

自屏郊藪一無干進意 案唐摭言云趙少師崇凝主

文策求就貢籍崇凝庭譴之北夢瑣言載崇凝之辭

曰張策衣冠子弟無故出家不能參禪訪道抗跡塵

外乃于御簾前進詩希望恩澤是書謂張策無仕進

意與摭言諸書異

杜曉傳祖審權仕唐位至宰相 審權原本作省權今

據新舊唐書改正

沈跡自廢者將十餘載 案吳縝歐陽史纂誤云據新
唐書宰相表杜讓能賜死至崔胤領鹽鐵前後止七
年歐陽史作十餘年誤蓋歐陽史沿是書之誤

以鋪席祭其先人 鋪席原本作補席據歐陽史改正
敬翔傳因金巒坡以爲門名 金巒歐陽史

作金鸞五代會要從是書今仍之

從嘉名也 案原本脫名字今從職官志增入

宿于車坊 車坊原本作中今據歐陽史及通鑑改正
李振傳劉中尉命其姪希貞來計大事 希貞原本作
希直今據通鑑改正

又遣供奉官李奉本 案原本脫奉本二字據本傳增
人

舊五代史卷十八攷證

舊五代史卷十九

宋司空同中書門下平章事薛居正等撰

列傳第九

梁書十九

氏叔琮尉氏人也唐中和末應募為騎軍初隸于龐師古為伍長叔琮壯勇沈毅膽力過人太祖討巢蔡於陳許間叔琮奮擊首出諸校太祖壯之自行伍間擢為後院馬軍都將時東伐徐鄆多歷年所叔琮身當矢石奮不顧命觀者許焉累遷為指揮使尋奏授許州刺史檢

校右僕射太祖伐襄陽叔琮失利

案舊唐書光化二年七月汴將氏叔琮陷

趙匡凝之隨唐鄧等州考刺史康懷英傳云從氏叔琮伐襄漢懷英以一軍攻下鄧州趙匡凝傳云太祖遣氏

叔宗伐之臣疑懼乞盟是役也實以勝歸而薛史言其
失利疑別有據歐陽史作攻襄陽戰數敗因薛史原文
而增益其辭與唐書異降爲陽翟鎮遏使尋又捍禦晉軍于洹水

有功遷曹州刺史天復元年春領大軍攻拔澤潞叔琮
遂引兵北掠太原師還除晉州節度使明年太祖屯軍
于岐下晉軍潛襲絳州前軍不利晉軍恃勝攻臨汾叔
琮嚴設備禦乃于軍中選壯士二人深目虬鬚貌如沙
陀者令就襄陵縣牧馬于道間蕃寇見之不疑二人因
雜其行間俄而伺隙各擒一人而來晉軍大驚且疑有
伏兵遂退據蒲縣時太祖遣朱友寧將兵數萬赴應悉
委叔琮節制既至諸將皆欲休軍叔琮曰若然則賊必

遁矣遁則何功焉因夜出潛師截其歸路遇晉軍遊騎數百盡殺之遂攻其壘拔之斬獲萬餘衆奪馬三百匹太祖聞之喜謂左右曰殺蕃賊破太原非氏老不可叔乃長驅收汾與晉人轉戰直抵并壘軍迴以其功奏加檢校司空自後累年晉軍不敢侵軼叔琮養士愛民甚有能政天復二年爲鄴州留後尋眞領保大軍節度使檢校司徒及昭宗東遷徵爲右龍虎統軍以衛洛陽天祐元年八月與朱友恭同受太祖密旨弑昭宗于大內既而責以軍政不理貶白州司戶

案舊唐書哀帝紀叔琮貶貝州司戶歐陽

史作流嶺南不言其地考當時賜叔琮等死其勅云請掾還方安能塞責若貝州近在河北不得云還方當從

薛史作白尋賜自盡叔琮將死呼曰賣我性命欲塞天

州為是下之謗其如神理何乾化二年詔許歸葬永樂大典卷一萬八千一

百二十六

朱友恭壽春人本姓李名彥威卅角事太祖性穎利善

體太祖意太祖憐之因畜為己子賜姓初名讓後改之

案通鑑云友恭幼為全忠家僮全忠養以為子時初建左長劍都以友恭董之

從太祖四征稍立軍功累遷諸郡指揮使檢校左僕射

乾寧中授汝州刺史加檢校司空光化初淮夷侵鄂渚

武昌帥杜洪來乞師太祖遣友恭將兵萬餘濟江應援

引兵至龍沙九江而還軍聲大振時淮寇據黃州友恭

攻陷其壁獲賊將瞿章俘斬萬計途經安陸因襲殺刺
史武瑜盡收其衆以功爲潁州刺史加檢校司徒天復
中爲武寧軍留後天祐初昭宗東遷洛邑徵拜左龍虎
統軍以衛宮闕尋與氏叔琮同受太祖密旨弒昭宗于
洛陽宮既而太祖自河中至責以慢于軍政貶崖州司

戶案北夢瑣言云朱全忠以朱友諒氏叔琮扇動軍情請誅朱友諒氏叔琮以成濟之罪歸之友諒臨刑訴
天日天若有知他日亦當如我後全忠卽位爲子友珪
所弒如其言考歐陽史通鑑俱作友恭而北夢瑣言作
友諒仍復其本姓名與氏叔琮同日賜死
殊誤永樂大典卷二十三十一

王重師潁州長社人也案歐陽史潁州作許州材力兼人沈默大

度臨事有權變劍稍之妙冠絕于一時唐中和末蔡寇

陷許昌重師脫身而來太祖異其狀貌乃隸于拔山都
每于軍前效用頗出儕類文德中令董左右長劍軍太
祖伐上蔡重師力戰有功及討兗鄆擢爲指揮使奏授
檢校右僕射重師枕戈擐甲五六年于齊魯間凡經百
餘戰由是威震敵人尋授檢校司徒爲潁州刺史乾寧
中太祖攻濮州縱兵壞其墉濮人因屯火塞其壞壘煙
焰亘空人莫敢越重師方苦金瘡卧于軍次諸將或勉
之乃躍起命壯士悉取軍中氈罽投水中擲于火上重
師然後率精銳持短兵突入諸軍踵之濮州乃陷重師
爲劍槊所傷身被八九創丁壯荷之還營且將斃矣太

祖驚惜尤甚曰雖得濮壘而失重師奈何亟命以奇藥
療之彌月始愈尋知平盧軍留後加檢校司徒其後北
伐幽滄鎮定屢與晉軍接戰頗得士心故多勝捷天祐
中授雍州節度使加同平章事數年治戎卹民頗有威
惠開平中爲劉捍所搆太祖深疑之然未有以發其事
案通鑑佑國軍節度使王重師鎮長安數年帝怒其貢
奉不時召重師入朝是重師之得罪由貢奉不時與薛
史無何擅遣裨將張君練縱兵深入邠鳳君練敗北太
祖聞之怒其專擅因追而斬之永樂大典卷一萬八千
一百二十六 案通鑑
不載張君練縱兵之事惟云劉捍至長安王重師不爲
禮捍譜之帝曰重師潛與邠岐通甲申貶溪州刺史尋
賜自盡夷其族此傳未經詳載據劉知俊傳太祖云王
重師得罪劉捍誤子事也與通鑑合此傳不載蓋史家

前後
省文

朱珍徐州豐縣雍鳳里人也太祖初起兵珍與龐師古
許唐李暉丁會氏叔琮鄧季筠王武等八十餘人以中
涓從摧堅陷陣所向盪決及太祖鎮汴兼領招討使署
珍爲宣武右職以總腹心於是簡練軍伍裁制綱紀平
巢破蔡多珍之力也始尙讓以驍騎五千人至繁臺珍
與龐師古齊奉國等擊退之及黃巢敗珍與并帥李克
用追至宛旬而還尋從太祖以汴宋亳之師入西華破
王夏寨勇冠軍鋒以功加秩光啟元年署諸軍都指揮
使始爲上將于是軍焦夷敗蔡師鐵林三千人盡俘其

將復西至汝鄭南過陳潁繚宋亳滑濮間與蔡賊交戰
鏖伏襲殺不知其數會滑州節度使安師儒戎政不治
太祖命珍與李唐賓率步騎以經略之始入境遇大雪
令軍士無得休息一夕馳至壁下百梯並升遂乘其墉
滑州平時太祖方謀濟師乃遣珍往淄州募兵行次任
縣東面都統齊克讓伏兵于孫師陂以邀珍珍大破之
進軍至牙山都虞候張仁遇白珍曰軍有不齊者當先
斬本都將後以狀聞願許之珍怒其專乃斬仁遇以徇
軍由是諸將感懼兵至乾封與淄人戰于白草口敗之
青人以步騎二萬列三寨于金嶺驛珍與戰連破之殲

其師盡獲軍器戎馬是夕博昌大獲兵衆其後破盧瑋張晷及朱瑄朱瑾之衆平定曹濮未嘗不在戰中梁山之役始與李唐賓不協珍在軍嘗私迎其室于汴而不先請太祖太祖疑之密令李唐賓察之二將不相下因而交爭唐賓夜斬關還汴以訴珍亦棄軍單騎而至太祖兩惜之故不罪俾還于師復以踏白騎士入陳亳間以邀蔡人遂南至斤溝破淮西石璠之師二萬擄璠以獻珍旋師自亳北趣靜戎濟舟于滑破黎陽臨河李固三鎮于內黃敗樂從訓萬餘人分命聶金范居實略澶州與魏師遇于臨黃魏軍有豹子軍二千人戮之無噍

類威振河朔復攻淮西至蔡夾河而寨敗賊將蕭皓之衆皆擁于河溺死之進軍蔡州營其西南旣破羊馬垣遇雨班師珍以兵援劉瓚赴楚州至襄山南遇徐戎扼其路珍乃攻豐下之時溥乃以全師會戰于豐南吳康里珍乃收豐破其三萬餘衆及蔡賊平珍比諸將功居多龍紀初與諸將屯于蕭縣以禦時溥珍慮太祖自至令諸軍葺馬廐以候巡撫李唐賓之裨將嚴郊獨慢焉軍候范權恃珍以督之唐賓素與珍不協果怒乃見以訴其事珍亦怒曰唐賓無禮遂拔劍斬之珍命騎列狀陳其事太祖初聞唐賓之死驚駭與敬翔謀詐令有司

收捕唐賓妻子下獄以安珍心太祖遂徑往蕭縣距蕭

一舍珍率將校迎謁梁祖令武士執之責其專殺命丁

會行戮案歐陽史作珍自縊死都將霍存等數十人叩頭以救太

祖怒以坐牀擲之乃退永樂大典卷二千三十一

李思安陳留張亭里人也初事汴將楊彥洪為騎士好

拳勇未弱冠長七尺超然有乘時自奮之意唐中和三

年太祖鎮汴嘗大閱戎旅觀其材甚偉之因錫名思安

字貞臣思安善飛稍所向披靡每從太祖征伐常馳馬

出敵陣之後測其厚薄而還或敵人有恃猛自衛者多

命取之必鷹揚靡卷擒馘于萬眾之中出入自若如蹈

無人之地太祖甚惜之命副王虔裕爲踏白將時巢蔡合從太祖每遣偵邏必先獨往巢敗走思安領所部百餘人追賊殺戮掩奪衆莫敢當尋領軍襲蔡寇于鄭都將李唐賓馬躡而墜思安援槊刺追者唐賓復其騎而還又嘗與蔡人鬪當陣生擒賊將柳行實其後渡長淮下天長高郵二邑又拒孫儒迫濠州皆有奇績累遷爲諸軍都指揮使奏官至檢校左僕射尋拜亳州刺史練兵禦寇邊境肅然思安爲性勇悍每統戎臨敵不大勝必大敗開平元年春率兵伐幽州營于桑乾河擄獲甚衆燕人大懼及軍迴率諸軍伐潞累月不克師人多

逸太祖怒甚詔疏其罪盡奪其官爵委本郡以民戶係
 焉踰歲起之復令領兵亦無巨績可紀太祖嘗因命將
 授鉞謂左右曰李思安當敵果敢無出其右者然每遇
 藩方擇材吾將用之則敗聞必至如是者二三矣則知
 飛將數奇前史豈虛言哉乾化元年秋又以爲相州刺
 史思安自謂當擁旄仗鉞及是殊不快意但日循晏安
 無意爲政及太祖北征以候騎之誤落然無所具而復
 壁壘荒圯帑廩空竭太祖貶柳州司戶尋死于相州

永樂

大典卷一萬三百八十八

案通鑑開化元年丙午至

相州刺史李思安不意帝猝至落然無具坐削官爵二
 年正月丁卯帝至獲嘉追思李思安去歲供饋有闕貶
 柳州司戶尋長流思安于崖州賜死據薛史則思安賜

死卽在相州未嘗
至貶所與通鑑異

鄧季筠宋州下邑人也少入黃巢軍隸于太祖麾下及
太祖鎮汴首署爲牙將主騎軍伐鄆之役生擒排陣將
劉矯以獻唐大順初唐帝命丞相張濬伐太原太祖奉
詔出師西至高平與晉人接戰軍旣不利季筠爲晉人
所擒克用見之甚喜釋縛待以賓禮俄典戎事季筠在
并門凡四稔案通鑑考異引唐餘錄謂季筠與李存孝並賜死蓋傳聞之誤景福二年
晉軍攻邢臺季筠領偏師預其後將及邢邢人陳于郊
兩軍酣戰之際季筠出陣飛馬來歸太祖大加獎歎賞
賚甚厚時初置廳子都最爲親軍命季筠主之旋改統

親騎又遷將中軍天祐三年奉授登州刺史下車稱理
 登州舊無羅城及季筠至郡率丁壯以築之民甚安之
 因相與立碑以頌其績太祖受禪改鄭州刺史尋主兵
 于河中為都指揮使時并人寇平陽季筠接戰于洪洞
 大克拜華州防禦使又繼領龍驤等諸軍騎士累官至
 檢校司空栢鄉之役季筠臨陣前却太祖亦未之罪乾
 化二年春太祖親伐鎮定駐于相州因閱馬怒其馬瘦
 與魏軍校何令稠陳令勳同斬于纛下
永樂大典卷一
 萬八千一百二

六十

黃文靖金鄉人少附于黃巢黨中巢敗歸于太祖累署

牙職繼遷諸軍指揮使從太祖南平巢蔡北定兗鄆皆有功唐大順中佐葛從周送朱崇節入潞會晉軍十餘萬近逼垣寨文靖慮孤軍難守乃與葛從周啟闖出師文靖爲殿命矢刃皆外向持重而還晉人不敢逼其年冬與康懷英渡淮入壽春之境下安豐霍丘至光州而還光化初晉將李嗣昭周德威寇于山東文靖佐葛從周統大軍禦之至沙河敗晉軍五千餘騎遂逐之越張公橋乃止後旬日復與晉人戰于邢州之北擒蕃將賁金鐵慕容騰李存建等百餘人奪馬數千匹尋以功表授檢校左僕射耀州刺史天祐二年春命佐楊師厚深

入淮甸越壽春侵廬江軍至大獨山遇淮夷殺五千餘
衆振旅而還改蔡州刺史加檢校司空又遷潁州刺史
太祖受禪復爲蔡州刺史入爲左神武統軍又改左龍
驤使乾化元年從太祖北征因閱馬得罪命斬之文靖
驍果善戰諸將皆惜之

永樂大典卷一萬
八千一百二十六

胡規兗州人初事朱瑾爲中軍都校兗州平署爲宣武
軍都虞候佐葛從周伐鎮定從張存敬收晉絳皆有功
署爲河中都虞候權鹽務天復中太祖迎駕在岐下以
規權知洛州昭宗還長安詔授皇城使及東遷以爲御
營使駕至洛授內園莊宅使天祐三年佐李周彝討相

州獨當州之一面頗以功聞軍還權知耀州事明年討
滄州爲諸軍壕寨使太祖受禪除右羽林統軍尋佐劉
鄴統兵收潼關擒劉知浣獻之乃以爲右龍虎統軍兼
侍衛指揮使乾化元年詔修洛河堤堰軍士因之斬伐
百姓園林太甚河南尹張宗奭奏之規得罪賜死

永樂大典

卷一萬八千
一百二十七

李讜河中臨晉人少時遊秦雍間爲人勇悍多力甚有
氣誼唐廣明初黃巢陷長安讜遂得仕于其間巢以讜
爲內樞密使

案新唐書黃巢傳及通鑑皆言巢以費傳古爲樞密使不載李讜疑與傳古先後授

偽官也

蓋讜曾委質于宦者出入于宮禁間巢以此用焉

其後巢軍既敗讜乃束身歸于太祖署為左德勝騎軍

都將從太祖討蔡賊頗立軍功及東伐兗鄆以所部士

伍俘獲甚眾改元從騎將表授檢校右僕射郴王友裕

領兵攻澤州時太祖駐大軍于盟津乃令讜將兵越太

行授以籌謀讜頗違節度久而無功案唐書李存孝傳云李讜收軍而遁

存孝擊至馬牢川俘斬萬計此傳不載蓋前後省文太祖遣追還廷責其罪戮之

于河橋永樂大典一萬三百八十八

李重胤案重原本作重裔蓋薛史沿避諱舊例今改畫一宋州下邑人狀貌雄

武初在黃巢黨中推為剛鷲唐中和四年五月同尙讓

李讜等率眾至繁與太祖之軍相距及巢寇漸衰乃率

衆來降太祖素識之拔用不次署爲先鋒步軍都頭與胡眞援河陽逼懷州重脣以部下兵突之射中蕃將安休休又令與李讜率騎軍至陝應接郭言迴次灑池破賊帥黃花子之衆改滑州夾馬指揮使蔡賊圍汴重脣以步兵攻下三寨擄獲甚多太祖大舉伐宗權俾重脣以滑兵爲先鋒及東討徐州下豐蕭二邑轉右廂馬步軍指揮使大順元年秋從邠王友裕收澤州與晉軍戰于馬牢川王師敗績迴守河陽太祖謂諸將曰李讜重脣違我節度不能立功頗辜任使于是與李讜並戮于

河橋

永樂大典卷一
萬三百八十八

范居實絳州翼城人。事太祖。初爲隊將。從討巢蔡有功。又從朱珍收滑州。改左廂都虞候。預破兗鄆。功遷感義都頭。鄭州馬軍指揮使。幽州劉仁恭舉衆南下寇魏郡。北闔居實與葛從周張存敬率兵救魏。大破幽滄之衆于內黃。太祖迎昭宗于岐下。以居實爲河中馬軍都指揮使。及昭宗還京。賜迎鑾毅勇功臣。遙領錦州刺史。又遷左龍驤馬軍都指揮使。從征淮南。迴改登州刺史。轉左神勇軍使。開平元年。用軍于潞州。命居寔統軍以解澤州之圍。授耀州刺史。令以郡兵屯固鎮。尋除澤州刺史。居寔拳勇善戰。頗立軍功。在郡以戎備不理。詔追赴

闕暴其玩寇之罪而斬之

永樂大典卷一萬
六千五百十七

史臣曰叔琮而下咸以鷹犬之才適遇雲龍之會勤勞
王室踐履將壇然俱不得其死豈不惜哉得非鳥盡弓
藏理當如是耶將梁祖之雄猜無漢高之大度歟乃知
自古帝王能保全功臣者唯光武一人而已矣語曰弑
父與君亦不從也而叔琮友恭從之何也既爲盜跖所
噬豈免成濟之誅臨終之言益彰其醜也

永樂大典卷
一萬六千五

百十
七

舊五代史卷十九終

舊五代史卷十九攷證

梁列傳九氏叔琮傳太祖伐襄陽叔琮失利 案舊唐

書光化元年汴將氏叔琮陷趙匡凝之隨唐鄧等州

是書趙匡凝傳亦云太祖遣氏叔琮伐之匡凝懼乞

盟是役也實以勝歸而叔琮本傳獨言失利未知所

據

今就襄陵縣牧馬于道間 案襄陵原本作襄陽今據

歐陽史改正

與氏叔琮同日賜死 案此朱友恭事是書及歐陽史

通鑑俱同北夢瑣言作友諒誤

太祖異其狀貌乃隸于拔山都 案拔山原本作技山
歐陽史作拔山攷當時軍旅皆以都名如黑雲都銀
槍都效節都橫街都之類今從歐陽史改正并增入
都字

朱珍傳敗樂從訓萬餘人 案通鑑作樂從訓來告急
遣都指揮使朱珍等分兵救從訓與此傳異

李重胤傳于是與李讜竝戮于河橋 案原本脫與字
今增入

范居實傳與葛從周張存敬率兵救魏 案原本脫從
字今增入

舊五代史卷十九攷證

舊五代史卷二十

宋司空同中書門下平章事薛居正等撰

列傳第十

梁書二十

謝瞳字子明福州人唐咸通末舉進士因留長安三歲不中第廣明初黃巢陷長安遂投跡于太祖泊居門下未嘗一日不在左右及太祖據同州遂署右職其年秋太祖與河中交戰再不利連上章請兵于巢僞右軍督尉孟楷抑而不進瞳揣太祖有擇福意乃進說曰黃家以數十萬之師值唐朝久安人不習戰因利乘便遂下兩京然始竊僞號任用已失其所今將軍勇冠三軍力

戰于外而孟楷專務壅蔽奏章不達下爲庸才所制無獨斷之明破亡之兆必矣况土德未厭外兵四集漕運波注日以收復爲名惟將軍察之太祖曰我意素決爾又如是復何疑哉翌日遂定策戮僞監軍使悉衆歸順於河中王重榮表瞳爲檢校屯田員外郎賜緋合奉表于蜀唐僖宗大悅召入顧問錫賚甚厚以功授朝散大夫太子率更令賜紫爲陵州刺史治郡一歲改檢校右散騎常侍通刺史在任四考頗有政績秋罷詣蜀行在太祖遣人迎之龍紀二年至東京勞徠彌厚賜第墅各一區錢千緡表爲亳州團練使兼太清宮副使加檢校

工部尙書是年冬太祖征淮南過郡因求侍府幕表爲
宣義軍節度副使充兩使留後曠在滑十三年部內增
戶約五萬益兵數千人累遷至大中大夫檢校右僕射
卒于滑開平初追贈司徒

永樂大典卷一萬八千一百二十八

司馬鄴字表仁其先河內温人也祖德璋仕唐爲杞王
傅父諱左武衛大將軍鄴資蔭出身頗知書累官至大
列唐天復初韓建用爲同州節度留後

案韓建傳作判官司馬鄴

昭

宗之幸鳳翔也太祖引兵入關前鋒至左馮翊鄴持印
鑰迎謁道左太祖以兵圍華州命入城招諭韓建建果
出降及大軍在岐下遣奏事于昭宗再入復出又使于

金州說其帥馮行襲俾堅攀附後歷宣武天平等軍從
事開平元年拜右武衛上將軍三年使于兩浙時淮路
不通乘驛者迂廻萬里陸行則出荆襄潭桂入嶺自番
禺泛海至閩中達于杭越復命則備舟楫出東海至于
登萊而揚州諸步多賊船過者不敢循岸必高帆遠引
海中謂之入陽以故多損敗鄴在海逾年漂至耽羅國
一行俱溺後詔贈司徒

永樂大典卷一萬
八千一百二十八

劉捍開封人父行仙宣武軍大將軍捍少爲牙職太祖
初鎮夷門以捍聰敏擢副典客唐中和四年夏太祖以
朱珍爲淄州刺史令收兵于淄青間命捍監其兵路逢

大敵皆破之入博昌獲精兵三萬以歸四月合大軍敗
蔡賊秦宗賢數萬衆于汴西文德元年十一月蔡將申
叢折宗權足納款于太祖使捍奏其事加兼御史大夫
光化三年六月太祖北伐鎮定至常山而王鎔危懾送
款于太祖命捍入壁門傳諭時兩軍未整守門者戈戟
千匝捍馳騎而入竟達其命又移師以攻中山至懷德
驛大破定人五萬衆王處直乞降捍復單馬入州安撫
而迴案梁祖下鎮定服中山舊唐書作光化三年九月
新唐書作十月薛史又總繫于六月以後據通鑑
自六月舉兵至九月始定中山也
太祖迎昭宗于岐下以捍爲親軍指
揮天復三年正旦宋文通令客將郭啟奇使于太祖命

捍復命昭宗聞其至卽召見詢東兵之事仍以錦服銀鞍勒馬賜之翌日授光祿大夫檢校司空登州刺史昭宗還京改常州刺史賜號迎鑾毅勇功臣四月太祖伐王師範于青州改左右長直都指揮使天祐三年正月授宋州刺史四月加檢校司徒太祖受禪授左龍虎統軍兼元從親軍馬步都虞候及上黨纏兵太祖親往巡撫以捍爲御營使大軍次昂車斥候來告蕃戎逼澤州命捍以兵千人赴之并軍遂遁車駕還京授捍侍衛親軍都指揮使晉人侵晉州從幸陝迴加檢校太保及從駕幸河中詔追王重師赴行在以捍爲雍州節度觀察

留後纔踰月劉知俊據同州反潛使人以厚利啗捍將校遂爲部下所執送于知俊知俊繫捍歸于鳳翔爲李茂貞所害開平四年贈太傅末帝卽位又贈太尉捍便習賓贊善于將迎自司賓局及征討四出必預其間雖無決戰爭鋒之績而承命奔走敷揚命令勤幹涖職以

至崇顯焉

永樂大典卷九千九十八

王敬蕘潁州汝陰人世爲郡武吏唐乾符初敬蕘爲本州都知兵馬使中和初寇難益熾郡守庸怯不能自固敬蕘遂代之監郡俄眞拜刺史加檢校右散騎常侍時州境荒饑大寇繼至黃巢數十萬衆寨于州南敬蕘極

力抗禦逾旬而退俄又宗權之眾凌暴益甚合圍攻壁
 皆力屈而去蔡賊復遣將刁君務以萬眾來逼敬堯列
 陣當之身先馳突殺敵甚多由是竟全郡壘遠近歸附
 及淮人不恭太祖屢以軍南渡路由州境敬堯悉心供
 億太祖甚嘉之乾寧二年署為泇淮上下都指揮使四
 年冬龐師古敗于清口敗軍逃歸者甚眾路出于潁時
 雨雪連旬軍士凍餒敬堯自淮燎薪相屬于道郡中設
 糜糗餅餌以待之全活者甚眾由是表知武寧軍節度
 徐宿觀察留後數月真拜武寧軍節度使

案文苑英華載授敬堯武

寧軍節度制有云襲淮流之積寇挺潛山之雄姿
 勇實兼人智能周物蓋因清口之役而加秩也

天復

二年入爲右龍武統軍天祐二年轉左衛上將軍開平元年八月以疾致仕尋卒于其第敬堯魁傑沈勇多力善戰所持槍矢皆以純鐵鍛就槍重三十餘斤摧鋒突陣率以此勝雖非太祖舊臣而達輸懇款保境合兵以輔興王之運有足稱者

永樂大典卷一萬八千一百二十六

高劭字子將淮南節度使駢之從子也父秦黔中觀察使唐僖宗避敵在蜀駢鎮淮南爲都統兼諸道鹽鐵使兵賦在已朝廷優假之以故劭幸而早官年十四遙領華州刺史光啓中以駢命謁晉公王鐸于鄭俄而州陷蔡劭爲賊所得使人守之戒四門日無出高大夫劭伺

守者稍惰佯爲乞食者過危垣取殍者衣全身易服得
佗兒抱之行出東郊門人以爲丐者不之及稍遠棄所
抱兒疾趨至中牟遂達于汴太祖以客禮遇之尋表爲
亳州團練副使知州事又數年辟爲宣武軍節度判官
在幕下頗以氣直自許後監鄭州事復權知徐州留後
唐昭宗之鳳翔太祖迎奉未出劭有疑謀遂令赴華州
詣丞相府以議其事行至高陵爲盜所害

永樂大典卷
五千五百三

八十

馬嗣勳濠州鍾離人世爲軍吏嗣勳有口辨習武藝爲
州客將唐景福元年三月太祖以壽州刺史江儒反下

蔡鎮使李立率兵攻濠梁刺史張遂俾嗣勳持州印籍

戶口以歸于太祖乾寧二年三月楊行密復攻濠州張

遂遣嗣勳求援于太祖俄而郡陷案九國志李簡傳乾寧二年從攻濠州濠

水深濶簡手搦重甲口銜大刀先渡踰壘破其關鍵擒

刺史張遂以獻新唐書楊行密傳與九國志畧同惟遂

字新唐書作燧嗣勳無所歸卽署爲元從押牙副典客頗稱任

使光化元年三月太祖令往光州說刺史劉存背淮賊

以向國案新唐書本紀乾寧三年楊行密陷光州劉存

死于弋陽授知光州軍事梁兵寇光州再用擊走之以

功遷光州刺史與薛史異又九國志吳有兩劉存其一

卽光州刺史其一陳州人後爲馬殷所害又從李彥威復黃州及武昌縣獲

刺史瞿章案新唐書本紀乾寧四年五月壬子朱全忠

梁將朱友恭圍瞿章于黃州命珣率兵援之黃州俄復陷戰不利而退薛史作光化元年與諸書互異

使光州持幣馬以賜劉存會淮賊急攻光州存與嗣勳

率兵大戰敗而走之又遣使于蜀及歸得其助軍賞實

甚多天復中太祖迎昭宗于岐下軍至華之西圍使嗣

勳人見韓建卽時同出迎謁及羅紹威將殺牙軍遣使

告于太祖求為外援時安陽公主初卒于魏太祖乃遣

嗣勳率長直官千人實兵仗于橐中肩舁以入于魏聲

言來致祭會葬牙軍不之覺天祐三年正月十六日夜

嗣勳與紹威親軍同攻牙軍至曙盡殪之嗣勳重傷旬

日而卒開平中累贈太保

永樂大典卷一萬八千一百二十八

張存敬譙郡人也性剛直有膽勇臨危無所畏憚唐中
和中從太祖赴汴以其折節頗見親昵首爲右騎都將
從討巢蔡凡歷百戰多于危蹙之間顯有奇畧由是頻
立殊効光啟中李罕之會晉軍圍張宗奭于盟津太祖
遣丁會葛從周存敬同往馳救存敬引騎軍先犯敵將
諸軍翼之敵騎大敗乃解河橋之圍大順二年爲諸軍
都虞候佐霍存董大軍收宿州以功奏加檢校兵部尙
書太祖東征徐兗存敬屢有俘斬之功凡授指顧皆與
機會矢石所及必以身先太祖尤加優異以爲行營都
指揮使檢校右僕射乾寧三年充武寧軍留後行潁州

刺史光化二年夏四月幽滄侵凌魏郡復以存敬為都

指揮使三年大舉與葛從周連統諸軍攻浮陽樹數十

柵圍劉守文累月時幽州劉仁恭舉兵來援存敬潛軍

擊之于乾寧軍南老鴉堤是日燕人大敗斬首五萬級

生擒馬慎交已下一百餘人獲馬萬餘蹄

案舊唐書光化二年三月

張存敬率師援魏州大敗燕軍仁恭父子僅免薛史作三年事與舊唐書異其年秋九月引

軍收鎮州存敬勒眾涉滹陀河師人鼓行而進逢鎮之

遊兵數千因逐之直人鎮之壅門收鞍馬牛馳萬計翌

日鎮人納質而旋尋為宋州刺史踰年甚有能政復擁

眾伐薊門數旬間連下瀛莫祁景四州擒俘不可勝紀

自懷德驛與中山兵接戰枕屍數十里中山開壁請降
天復元年春太祖以河中節度使王珂與太原結親憑
恃驕恣命存敬統大軍討之卽日收絳州擒刺史陶建
釗降晉州刺史張漢瑜二郡平連圍河中王珂請降太
祖嘉之乃以存敬爲護國軍留後未幾檢校司空尋移
宋州刺史將之任所寢疾踰旬卒于河中太祖聞之痛
惜移晷開平初追贈太保乾化三年又追贈太傅子仁
愿晉天福中仕至大理

永樂大典卷六
千三百五十

寇彥卿字俊臣大梁人也祖瑄父裔皆宣武軍牙校太
祖鎮汴以彥卿將家子擢在左右弱冠選爲通贊官太

祖爲元帥補元帥府押牙充四鎮通贊官行首兼右長
直都指揮使累奏授檢校司徒領洛州刺史羅紹威將
殺牙軍遣使告于太祖太祖命彥卿使于魏密與紹威
謀之竟成其事彥卿之力也彥卿身長八尺隆準方面
語音如鐘善騎射好書史復善伺太祖之旨凡所作爲
動皆云合太祖每言曰敬翔劉捍寇彥卿蓋爲我而生
其見重如此太祖有所乘烏馬號一丈烏嘗以賜彥卿
天復中太祖迎昭宗于鳳翔累于岐軍對陣時彥卿爲
諸道馬步軍都排陣使嘗躬擐甲胄乘其所賜烏馬馳
騁于陣前太祖目之曰真神王也昭宗還京賜迎鑾殺

勇功臣改邢州刺史尋遷亳州團練使

案通鑑開平二年帝從吳越王

錢鏐之請以亳州團練寇彥卿為東南面行營都指揮

使使擊淮南十一月彥卿帥眾二千襲霍丘為土豪朱

景所敗又攻廬壽二州皆不勝淮南遣滁州刺史李儼

拒之九國志朱景傳梁祖聞景名命寇彥卿率勁騎三

千襲霍丘圖取景且諭梁祖之意令降景率其徒戰于

上墟林澤中射死者無數彥卿兵折力殫而去此事薛

史及歐陽史皆不載太祖受禪為華州節度使加檢校太保歲餘

入為左金吾衛大將軍充街使一日過天津橋有老人

案歐陽史悞衝其騶道者排之落橋而斃為御史府所

作民梁現彈太祖不得已責授左衛中郎將

案通鑑作遊擊將軍左衛中郎將不

數月除相州防禦使

案相州歐陽史作襄州依前行營諸將排陣

使未幾授河陽節度使加檢校太傅及太祖遇弒彥卿

追感舊恩圖御容以奠之每因對客言及先朝舊事卽涕泗交流末帝嗣位遙領興元節度使東南面行營都招討使以拒淮寇尋改右金吾衛上將軍貞明初授鄧州節度使會淮人圍安陸彥卿奉詔領兵解圍大破淮賊而迴四年卒于鎮時年五十七詔贈侍中彥卿貞幹明敏善事人主然怙寵作威多忌好殺雖顯立功名而

猶爲識者之所鄙焉

永樂大典卷一萬九千三百三十

史臣曰

案原本有闕文

存敬有提鼓之勞彥卿偶攀鱗之會俱

爲藩后亦其宜哉

永樂大典卷一萬九千三百三十

舊五代史卷二十終

舊五代史卷二十攷證

梁列傳十司馬鄴傳揚州諸步多賊船 諸步原本作

諸走攷容齋隨筆云步者水傍之名今改正

馬嗣勳傳刺史張遂 案新唐書作張璪

張存敬傳擒刺史陶建釗 建釗原本作建鉦今據通

鑑改正

舊五代史卷二十攷證
一

舊五代史卷二十一攷證

舊五代史卷二十一

宋司空同中書門下平章事薛居正等撰

列傳第十一

梁書二十一

龐師古曹州南華人初名從以中涓從太祖性端愿未嘗離左右及太祖鎮汴樹置戎伍始得馬五百匹卽以師古爲偏將援陳破蔡累有戰功及朱珍以罪誅遂用師古爲都指揮使乃渡淮饒軍于廬壽攻滁州破天長下高郵泇淮轉戰所至克捷尋代朱友裕領軍攻下徐州斬時溥首以獻遂移軍伐兗州入中都寨于梁山敗朱瑄之眾襲至壘下又破朱瑾于清河從討汝陽與朱

瑄朱瑾及晉將史儼兒戰于故樂亭大捷而廻乾寧四

年正月復統諸軍伐鄆拔之擒其帥朱瑄以獻始表為

天平軍節度留後尋授徐州節度使案文苑英華有授

度改名師古制張立晏之辭也中云自委之留事須我

詔條惠愛行于鄉閭威望揚于士伍是宜錫以旂幢進

其官秩奄有徐夷之四履爰撫大彭之故都是官至檢

校司空乾寧四年八月與葛從周分統大軍渡淮以伐

楊行密十一月師古寨于清口寨地卑下玉堂閒話云

萬于清口所屯之地蓋兵書謂之絕或請遷移弗聽俄

有告淮人決上流者曰水至矣師古怒其惑眾斬之案

國志侯瓚傳時兵起倉卒加以陰寒士皆飲冰餐雪而

行甫及梁營則豎戈植足闕志未決朱瑾與瓚率五十

騎潛濟淮入自壘北舞榭而馳器聲雷沸梁兵皆殞眩不能舉遂斬麗從大將繼之死者大半是清口之戰因雪夜不備而敗也薛史以爲決淮上流須與我軍在淖與九國志異新唐書楊行密傳兼用之

中莫能戰而吳人襲焉故及于敗師古沒于陣

永樂大典卷一

萬八千一百二十六

霍存洛州曲周縣人性驍勇善騎射在黃巢中已爲將領唐中和四年太祖大破巢軍于王滿渡時存與葛從周張歸霸皆自巢軍來降太祖宥而納之其後破王夏寨擊殷鐵林並在戰中尋佐朱珍取滑臺攻淄州取博昌皆預戰立功時蔡賊張晁在汴北存以三千人夕犯其營破之用本部騎兵敗秦賢軍殺五千人連破四寨

盡得其輜重從討盧瑋張旺殪萬餘人存功居多我軍之圍濮州也有賊升眺樓大詬太祖怒甚召存射之矢一發而死隕其下賞賚甚厚復佐朱珍擒石璠破魏師敗徐戎又佐龐師古至呂梁敗時溥二千餘眾以是累遷官初王師渡淮乏食不甚利惟存軍戰有功淮賊乃引退太祖之討宿州也葛從周以水壞其垣丁會以師乘其墉存戰壘外敗其軍宿人乃降明年佐郴王友裕擊時溥于碭山破之獲蕃將石君和等五十人歐陽史云存代李唐賓攻時溥溥敗碭山存獲其將石君和等五十人梁攻宿州葛從周引水浸之丁會與存戰城下遂下之是歲復與晉軍戰于馬牢川始入為前鋒出則後拒晉

不敢逼乃渡河襲淇門殺三千餘人曹州刺史郭紹賓
之來歸也存以師援之遂代其任始朱友裕以大軍伐
鄆臨其壁旣而師陷圍中以急來告存領二百騎馳赴
擊退之太祖喜拔爲諸軍都指揮使景福二年春太祖
親至曹州留騎軍數千令存將之且曰有急則倍道兼
行以赴之俄聞朱瑾領兵二萬入援彭門存乃領騎軍
馳赴之與徐兗之眾合戰于石佛山下大敗之存亦中
流矢而卒時人稱其忠勇初朱珍李唐賓之歿龐師古
代珍存代唐賓戰伐功績多與師古同始遙領韶州牧又
改賀州後用爲權知曹州刺史官至檢校右僕射及太

祖登極屢有征討因起猛士之歎一日幸講武臺閱兵
謂諸將曰霍存在朕安有此勞苦耶諸君其思之他日
語又如如是累贈官至太保子彥威後唐明宗朝爲青州

節度使

永樂大典卷一萬
八千一百二十六

符道昭淮西人性強敏有武略秦宗權用爲心膂使監
督諸軍後爲騎將尤能布陣勇聞于時然剛而無操善
迎人意一見若盡肺腑必甚愛其才而道昭之心腹颺
矣秦宗權之將敗也有薛潛者支孽隊伍道昭謂所私
曰蔡弱矣乃歸潛潛欲敗復奔洋州依葛佐攻興元軍
不利復奔于岐宋文通愛之養爲己子名繼遠遂易其

宗及得軍職悉超儕伍後爲巴州刺史又奏爲隴州防禦使兼中軍都指揮使太祖迎奉昭宗駐軍于岐下道昭頻領騎士敢鬪戰屢爲王師所敗遂來降太祖素聞其名待之甚厚昭宗反正奏授秦州節度使同平章事遣兵援宋不克而還先是李周彝棄鄜州自投歸國署爲元帥府行軍左司馬寵冠霸府及道昭至以爲右司馬使與周彝同領寇彥卿南大豐閻寶以下大軍伐滄州及太祖幸魏州討牙軍中軍前有魏博將山河營指揮使左行遷聞府中有變引軍還屯歷亭自稱留後從亂者數萬人道昭佐周彝與彥卿已下大破之殺四萬

餘人擒左行遷斬之有史仁遇亦聚徒數萬據高唐又破之擒仁遇以獻乘勝取澶博二州平之復殺萬餘人道昭性勇果多率先犯陣屢有摧失而周彝彥卿犄角繼進連以捷告護兵者上功不實皆以道昭爲首太祖陰知之俱不議賞及滄州之圍也不用騎士令道昭牧馬于堂陽太祖受禪後委兵柄與康懷英等攻潞州以蚰蜒塹繚之飛鳥不度旣踰歲晉人援至王師大敗道昭爲晉軍所殺

永樂大典卷一萬八千一百二十七

徐懷玉本名琮亳州雋夷縣人少以雄傑自任隨太祖起軍唐中和末後至大梁光啟初蔡寇屯金堤驛懷玉

將輕騎連破之由是累遷親從副將改左長劍都虞候
又從破蔡賊于板橋收秦宗權八寨奏加檢校右散騎
常侍文德初同諸軍解河陽之圍復從破徐宿乾寧中
奏加檢校刑部尙書太祖賜名懷玉破朱瑾于金鄉南
擒宗江以獻表授金紫光祿大夫檢校右僕射乾寧四
年龐師古失利于清口懷玉獨全軍以退光化初轉滑
州右都押牙兼右步軍指揮使俄奏授沂州刺史頃之
王師範以青州叛屢出兵侵軼懷玉擊退之天復四年
轉齊州防禦使加檢校司空從大軍迎駕于岐下歸署
華州觀察留後一年復領所部兵戍雍州尋召赴河中

補晉絳同華五州馬步都指揮使天祐三年授左羽林
統軍轉右龍虎統軍領六軍之士赴澤州尋爲晉軍所
攻晝夜衝擊穴地而入懷玉率親兵逆殺于隧中晉軍
遂退開平元年授曹州刺史加檢校司徒明年除晉州
刺史其秋晉軍大至已乘其墉懷玉選親兵五十餘人
擁殺下城晉軍旣退出家財以賞戰士歲中晉軍又至
懷玉領兵敗之于洪洞三年制授鄜坊節度使特進檢
校太保練兵繕壁人頗安之加檢校太傅乾化二年庶
人友珪旣篡立河中朱友謙拒命遣兵襲鄜州懷玉無
備尋爲河中所虜囚于公館及友珪遣康懷英率師圍

河中友謙慮懷玉有變遂害之懷玉材氣剛勇臨陣未嘗折退平生金瘡被體有戰將之名焉

永樂大典卷一
萬人千一百二

七十

郭言太原人也家于南陽新野少以力穡養親鄉里稱之唐廣明中黃巢擁眾西犯秦雍言爲巢黨所執後從太祖赴汴初爲騎軍繼有戰功後擢爲裨校言性剛直有權畧勤于戎事或以家財分給將士之貧者由是頗得士心屢將兵與蔡寇戰于浚郊每以少擊眾出必勝歸太祖嘉其勇果謂賓佐曰言乃吾之虎侯也時宗權支黨數十萬太祖兵不過數十旅每恨其寡與之不敵

一日命言董數千人越河洛趨陝虢招召丁壯以實部
 伍言夏往冬旋得銳士萬餘遂遷步軍都將自是隨太
 祖掩襲蔡寇斬獲掠奪不可勝紀宗權以茲敗北太祖
 盡收其地因命言將兵導達貢奉以安郵傳自汴鄭迄
 于潼關去奸恤弱甚得其所光啟中唐天子以太祖兵
 威日振命兼揚州節度使太祖遣幕吏李璠領兵赴維
 揚以制置為名時言為李璠前鋒深入淮甸破盱眙而
 還案通鑑云時溥以師襲之言力戰得免梁祖紀亦作不克進而還與傳異梁祖東伐徐鄆
 言將偏師略地千里頻逢寇敵言出奇決戰所向皆捷
 大挫東人之銳太祖錄其績以排陣斬斫之號委之尋

表爲宿州刺史檢校右僕射于時徐宿兵鋒日夕相接
控扼偵邏以言爲首景福初時溥大舉來攻宿州言勇
于野戰喜逢大敵自引銳兵擊溥殺傷甚眾徐戎乃退
言爲流矢所中一夕而卒

永樂大典卷二萬
二千一百六十

李唐賓陝州陝縣人也中和四年二月尙讓之寇繁臺
也唐賓與李讜霍存並爲巢將與太祖之軍戰于尉氏
門外三月太祖破瓦子寨唐賓與王虔裕來降時黃巢
壁于陳郊乃命唐賓摩其西闔焚焉王滿之師王夏之
陣唐賓悉在戰中後與朱珍趣淄州所向摧敵及取滑
平蔡前後破鄆淮徐之眾功與朱珍略等而驍勇絕倫

善用矛未嘗不率先陷陣其善于治軍行師之道亦與
珍齊名珍之擒石璠也唐賓亦泐淮與郭言犄角下盱
眙其後渡河破黎陽李因等鎮攻澶州下內黃敗魏師
未嘗不與珍同暨攻蔡之役珍自西南破其外垣唐賓
亦堙壕坎墉摧其東北隅乃伐徐取豐時溥軍于吳康
珍亟遇之未能却唐賓引本軍擊敗之珍遂大勝每興
師必與珍偕用故往無不利然而剛中用壯遂爲珍所
害以謀叛聞太祖聞之痛惜累日及誅朱珍後令其妻
孥至軍收葬而加弔祭焉

永樂大典卷一
萬三百六十

王虔裕瑯琊臨沂人也家于楚丘少有膽勇多力善射

以弋獵爲事唐乾符中諸葛爽聚徒于青棣間攻剽郡縣虔裕依其眾及爽歸順乃以虔裕及其眾隸于宣武軍太祖鎮汴四郊多事始議選將征討首以虔裕縮騎兵恆爲前鋒及太祖擊巢蔡于陳州虔裕連拔數寨擒獲萬計巢孽旣遁虔裕躡其迹追至萬勝戍賊眾饑乏短兵纔接而潰太祖以其勞表授義州刺史蔡人日縱侵掠陳鄭許亳之郊頻年大戰虔裕掩襲攻拒凡百餘陣勦戮生擒不知紀極秦宗賢寇汴南鄙太祖令虔裕逆擊于尉氏不利而還太祖怒命削職拘于別部踰年邢州孟遷請降未幾晉人伐邢孟遷遣使來乞師太祖

先遣虔裕選勇士百餘人徑往赴之伺夜突入邢州明

日循堞樹立旗幟晉人不測乃退數月復來圍邢時太

祖大軍方討兗鄆未及救援案通鑑考異云是時全忠方攻時溥未討兗鄆也傳

誤邢人因而攜貳遷乃繫虔裕送于太原尋為所害承樂

大典卷一萬八千一百二十七

劉康父壽州安豐縣人也以農桑為業唐乾符中關東

羣盜並起江淮間徧羅其苦因為巢黨所掠康父沉默

有膂力善用矛槊然不樂為暴中和三年從太祖赴鎮

委以心腹康父枕戈擐甲夷險無憚其後累典親軍襲

巢破蔡斬獲尤多累以戰功遷元從都將從太祖連年

攻討徐兗鄆所向多捷尤善于營壘充諸軍壕寨使及太祖盡下三鎮議其功奏加檢校右僕射兼領軍衛尋

遷密州刺史政甚簡靜時王師範叛據青州乞師于淮

夷淮人遂攻密州密兵素少執銳者不滿千夫而淮賊

踰萬康父率老弱守陴自別領少壯日與接戰于密之

四郊俘擒千計賊知密州虛弱援兵未至晝夜急攻遂

陷康父為賊所害

永樂大典卷九千九十八

王彥章字賢明

案歐陽史作字子明

鄆州壽張縣人也

案歐陽史作鄆州壽

昌祖秀父慶宗俱不仕以彥章貴秀贈左散騎常侍慶

宗贈右武衛將軍彥章少從軍隸太祖帳下以驍勇聞

稍遷軍職累典禁兵從太祖征討所至有功常持鐵槍
衝堅陷陣開平二年十月自開封府押牙左親從指揮
使授左龍驤軍使三年轉左監門衛上將軍依前左龍
驤軍使乾化元年改行營左先鋒馬軍使又加金紫光
祿大夫檢校司空依前左監門衛上將軍二年庶人友
珪篡位加檢校司徒三年正月授濮州刺史本州馬步
軍都指揮使依前左先鋒馬軍使未幾改先鋒步軍都
指揮使四年爲澶州刺史進封開國伯五年三月朝廷
議割魏州爲西鎮慮魏人不從遣彥章率精騎五百屯
鄴城駐于金波亭以備非常是月二十九日夜魏軍作

亂首攻彥章于館舍彥章南奔七月晉人攻陷澶州彥

章舉家陷沒

案通鑑晉人夜襲澶州陷之刺史王彥章在劉鄩營晉人獲其妻子是當時澶州之

陷因刺史他出而掩其不備非彥章力不能守也歐陽史極推重彥章而載澶州事不詳蓋未博考晉王

遷其家于晉陽待之甚厚遣細人間行誘之彥章卽斬

其使以絕之數年其家被害九月授汝州防禦使檢校

太保依前行營先鋒步軍都指揮使貞明二年四月改

鄭州防禦使三年十二月授西南行營馬軍都指揮使

加檢校太傅依前鄭州防禦使頃之授行營諸軍左廂

馬軍都指揮使五年五月遷許州兩使留後軍職如故

六年正月正授許州匡國軍節度使充散指揮都頭都

軍使進封開國侯未幾授北面行營副招討使七年正月移領滑州三年四月晦晉師陷鄆州中外大恐五月以彥章代戴思遠爲北面招討使拜命之日促裝以赴滑臺遂自楊村砦浮河而下水陸俱進斷晉人德勝之浮梁攻南城拔之晉人遂棄北城併軍保楊劉彥章以舟師沿流而下晉人盡徹北城拆屋木編棧置步軍于其上與彥章各行一岸每遇轉灘水匯卽中流交鬪流矢雨集或舟楫覆沒比及楊劉凡百餘戰彥章急攻楊劉晝夜不息晉人極力固守垂陷者數四六月晉王親援其城彥章之軍重壕復壘晉人不能入晉王乃于博

州東岸築壘以應鄆州彥章聞之馳軍而至急攻其柵
自旦及午其城將拔會晉王以大軍來援彥章乃退七
月晉王至楊劉彥章軍不利遂罷彥章兵權詔令歸闕
以段凝爲招討使先是趙張二族撓亂朝政彥章深惡
之性復剛直不能緘忍及授招討之命因謂所親曰待
我立功之後回軍之日當盡誅奸臣以謝天下趙張聞
之私相謂曰我輩寧死于沙陀之手不當爲彥章所殺
因協力以傾之時段凝以賄賂交結自求兵柄素與彥
章不協潛害其功陰行逗撓遂至王師不利竟退彥章
而用段凝未及十旬國以之亡矣是歲秋九月朝廷聞

晉人將自兗州路出師末帝急遣彥章領保鑾騎士數

千于東路守捉案歐陽史從家傳作保鑾士五百人又

非今考通鑑云梁主命王彥章將保鑾士及他兵合萬

人屯兗鄆之境是彥章所將且不止薛史所云數千矣

又考通鑑李嗣源敗彥章所將止于獲將士三百人斬

首二百級使彥章所將止于五百是師徒盡喪單騎遁

還不應尙能再戰也彥章忠于所事百折不回不幸為

監軍張漢傑所制力竭而亡非戰之罪歐陽史必欲減

其兵數恐且以鄆州為敵人所據因圖進取合張漢傑

轉非實錄為監軍一日彥章渡汶以略鄆境至遞坊鎮為晉人所

襲彥章退保中都十月四日晉王以大軍至彥章以眾

拒戰兵敗為晉將夏魯奇所擒魯奇嘗事太祖與彥章

素善及彥章敗識其語音曰此王鐵槍也揮稍刺之彥

章重傷馬踣遂擒晉王見彥章謂之曰爾常以孺子待我今日服未又問我素聞爾善將何不保守兗州此邑素無城壘何以自固彥章對曰大事已去非臣智力所及晉王惻然親賜藥以封其創晉王素聞其勇悍欲全活之令中使慰撫以誘其意彥章曰比是匹夫本朝擢居方面與皇帝十五年抗衡今日兵敗力窮死有常分皇帝縱垂矜宥有何面目見人豈有爲臣爲將朝事梁而暮事晉乎得死幸矣晉王又謂李嗣源曰爾宜親往諭之庶可全活時彥章以重傷不能興嗣源至卧內以見之謂嗣源曰汝非邈佶烈乎邈佶烈蓋嗣源小字也彥

章素輕嗣源故以小字呼之既而晉王命肩輿隨軍至
任城彥章以所傷痛楚堅乞遲留遂遇害時年六十一
彥章性忠勇有膂力臨陣對敵不顧身居嘗謂人曰李
亞子鬪鷄小兒何足顧畏初晉王聞彥章授招討使自
魏州急赴河上以備衝突至則德勝南城已爲所拔晉
王嘗曰此人可畏當避其鋒一日晉王領兵追潘張寨
大軍隔河未能赴援彥章援槍登舟叱舟人解纜招討
使賀瓌止之不可晉王聞彥章至抽軍而退其驍勇如
此及晉高祖遷都夷門嘉彥章之忠款詔贈太師搜訪
子孫錄用

永錄大典卷一萬八千一百二十七五代史
補王彥章之應募也同時有數百人而彥章

營求爲長眾皆怒曰彥章何人一旦自草野中出便欲居我輩之上是不自量之甚也彥章聞之乃對主將指數百人曰我天與壯氣自度汝等不及故求作長耳汝等咄咄得非勝負將分之際耶且大凡穉兒開口便言死死則未暇且共汝輩赤脚入棘針地走三五遭汝等能乎眾初以爲戲旣而彥章果然眾皆失色無敢效之者太祖聞之以爲神人遽擢用之

賀德倫其先河西部落人也父懷慶隸滑州軍爲小校德倫少爲滑之牙將太祖領四鎮德倫以本軍從繼立軍功累厯刺史留後遷平盧軍節度使及魏博楊師厚卒朝廷以德倫代其任貞明元年三月二十九日夜魏軍作亂執德倫囚于別館盡殺其部眾爲亂首張彥所迫遣使歸款于太原晉王自黃澤嶺東下至臨清德倫

遣從事司空頽密啟晉王訴以張彥凌辱之事晉王至

永濟斬彥等八人然後入于魏德倫即以符印上晉王

通鑑晉王既入德倫上印節請王兼領天雄軍王固辭

日比聞汴寇侵逼貴道故親董師徒遠來相救又聞城

中新羅塗炭故暫入存撫明公不垂鑒信乃以印節見

推誠非素懷德倫再拜曰今寇敵密邇軍城新有大變

人心未安德倫心腹紀綱為張彥所殺殆盡形孤勢弱

安能統軍一旦生事恐負大恩王乃受之 尋授

雲州節度使行次河東監軍張承業留之不遣頃之王

擅以急兵襲太原德倫部下多奔逸承業懼其為變遂

誅德倫并其部曲盡殺之 永樂大典卷一萬七千四百六十七

舊五代史卷二十一終

舊五代史卷二十一攷證

梁列傳十一龐師古傳始表爲天平軍節度留後尋除授徐州節度使 案師古先爲留後繼授節度通鑑止作留後誤

霍存傳用本部騎兵敗秦賢軍 秦賢王虔裕傳作秦

宗賢

有賊升眺樓大詬 眺樓原本作昭樓今據歐陽史改符道昭傳符道昭淮西人 案歐陽史作蔡州人

徐懷玉傳授左羽林統軍 案歐陽史作右羽林統軍

郭言傳破盱眙而還 案通鑑作言力戰得免梁祖紀

亦作不克而還與此傳異

李唐賓傳時溥軍于吳康 吳康原本訛吳唐今據歐

陽史改正

王虔裕傳時太祖大軍方討兗鄆未及救援 案通鑑

攷異云是時全忠方攻時溥未討兗鄆也傳誤

劉康父傳尋遷密州刺史 密州原本訛宣州今據新

唐書昭宗紀改正

王彥章傳彥章字賢明鄆州壽張縣人也 賢明歐陽

史作子明壽張歐陽史作壽昌

舊五代史卷二十一攷證

舊五代史卷二十二

宋司空同中書門下平章事薛居正等撰

列傳第十二

梁書二十二

楊師厚潁州斤溝人也爲李罕之部將以猛決聞尤善騎射及罕之敗退保澤州師厚與李鐸何綱等來降太祖署爲忠武軍牙將繼厯軍職累遷檢校右僕射表授曹州刺史唐天復三年從太祖迎昭宗于岐下李茂貞以勁兵出戰爲師厚所敗及王師範以青州叛太祖遣師厚率兵東討時淮賊王景仁以眾二萬來援師範師厚逆擊破之追至輔唐縣斬數百級授齊州刺史將之

任太祖急召見于鄆西境遣師厚率步騎屯于臨胸而
聲言欲東援密州留輜重于臨胸師範果出兵來擊師
厚設伏于野追擊至聖王山殺萬餘眾擒都將八十人
未幾萊州刺史王師誨以兵救師範又大敗之自是師
範不復敢戰師厚移軍寨于城下師範力屈竟降天復
四年三月加檢校司徒徐州節度使天祐元年加諸軍
行營馬步都指揮使二年八月太祖討趙匡凝于襄陽
命師厚統前軍以進趙匡凝嚴兵以備師厚至穀城西
童山刊材造浮橋引軍過漢水一戰趙匡凝敗散攜妻
子沿漢遁去翌日表師厚爲山南東道節度留後

案唐書天

祐三年六月甲申勅襄州近因趙匡凝作帥請別立忠義軍額既非往制固是從權忠義軍額宜停廢依舊爲山南東道節度使是山南東道復置于天祐三年而薛史于二年八月已云表師厚爲山南東道節度使留後蓋史家追卽令南討荊州留後趙匡明亦棄軍上峽不書之意

泆旬併下兩鎮乃正授襄州節度使先是漢南無羅城師厚始興板築周十餘里郭郭完壯開平元年加檢校太保同平章事明年又加檢校太傅三年三月入朝詔兼潞州行營都招討使無何劉知俊據同州叛師厚與劉鄩率軍西討至潼關擒知俊弟知浣以獻知俊聞師厚至卽西走鳳翔師厚進攻至長安時知俊已引岐寇據其城師厚以奇兵傍南山急行自西門而入賊將王

建驚愕不知所為遽出降制加師厚檢校太尉頃之晉

王與周德威丁會符存審等以大眾攻晉州甚急太祖

遣師厚帥兵援之軍至絳州晉軍扼蒙阮之險師厚整

眾而前晉人乃徹圍而遁案通鑑考異引梁實錄云生擒賊將蕭萬通等賊由是棄

寨而遁莊宗實錄云汴軍至蒙阮周德威逆戰敗之斬首二百級二軍各言勝捷其互異如此通鑑定從薛史

及梁實錄四年二月移授陝州節度使五年正月王景仁敗

于柏鄉晉人乘勝圍邢州掠魏博南至黎陽師厚受詔

以兵屯衛州晉軍攻魏州不克而退師厚追襲過漳河

解邢州之圍改授滑州節度使明年太祖北征令師厚

以大軍攻棗強逾旬不能克太祖屢加督責師厚晝夜

奮擊乃破之盡屠其城車駕還師厚屯魏州及庶人友

珪篡位魏州衙內都指揮使潘晏與大將臧延範趙訓

謀變有密告者師厚布兵擒捕斬之

案歐陽史云師厚乘間殺魏牙將潘

晏臧延範等逐出節度使羅周翰與薛史相異

越二日又有指揮使趙賓夜率

部軍環甲俟旦爲亂師厚以衙兵圍捕賓不能起乃越

城而遁師厚遣騎追至肥鄉擒其黨百餘人歸斬于府

門友珪卽以師厚爲魏博節度使檢校侍中未幾鎮人

晉人侵魏之北鄙師厚率軍至唐店破之斬首五千級

擒其都將三十餘人是時師厚握河朔兵威望振主友

珪患之詔師厚赴闕師厚乃率精甲萬人至洛陽嚴兵

於都外自以十餘人入謁友珪懼厚禮而遣之及末帝將圖友珪遣使謀于師厚深陳款効且持書于侍衛軍使袁象先及主軍大將又遣都指揮使朱漢賓率兵至滑州以應禁旅友珪卽誅末帝卽位于東京首封師厚爲鄴王加檢校太師中書令每下詔不名以官呼之事無巨細必先謀于師厚師厚頗亦驕誕先是鎮人以我柏鄉不利之後屢擾邊境師厚總大軍直抵鎮州城下焚盪間舍移軍掠藁城束鹿至深州而歸乾化五年三月卒于鎮廢朝三日贈太師師厚純謹敏幹深爲太祖知遇委以重兵劇鎮他莫能及然而末年矜功恃眾驟

萌不軌之意于是專割財賦置銀槍效節軍凡數千人

皆選摘驍銳縱恣豢養復故時牙軍之態時人病之

清異

錄云槍材難得十全魏州石屋材多可用楊師厚時銀槍效節都皆采于此向時河朔之俗

上元比屋夜游及師厚作鎮乃課魏人戶立燈竿千釘

萬炬洞照一城縱士女嬉游復彩畫舟舫令女妓權歌

于御河縱酒彌日又于黎陽採巨石將紀德政以鐵車

負載驅牛數百以拽之所至之處丘墓廬舍悉皆毀壞

百姓望之皆曰碑來及碑石纔至而師厚卒魏人以爲

悲來之應末帝聞其卒也于私庭受賀乃議裂魏州爲

兩鎮既而所樹親軍果爲叛亂以招外寇致使河朔淪

陷宗社覆滅由師厚召之也永樂大典卷一萬八千一百二十六

牛存節字贊真青州博昌人也本名禮太祖改而字之少以雄勇自負唐乾符末鄉人諸葛爽為河陽節度使存節往從之爽卒存節謂同輩曰天下洶洶當擇英主而事以圖富貴遂歸于太祖初授宣義軍小將屬蔡寇至金隄驛犯酸棗靈昌存節日與之鬪凡二十餘往每往必執俘而還前後斬首二十餘級獲孳畜甚眾太祖擊蔡賊于板橋赤垆酸棗門封禪寺枯河北存節皆預其行與諸將于濮州南劉橋范縣大破鄆眾自此深為太祖獎遇文德元年夏李罕之以并軍圍張宗奭于河

陽太祖遣存節率軍赴之屬歲歉饑餽不至村民有儲
乾樵者存節以器用錢帛易之以給軍食大破賊于沮
河罕之引眾北走又預計徐宿有功及討河北存節前
鋒下黎陽收臨河至內黃西以兵千餘人當魏人萬二
千眾大破其陣殪仆蔽野太祖深所歎激謂有神兵之
助大順元年改滑州左右廂牢城使與諸將討時溥累
破賊軍景福元年秋改過後都指揮使攻濮之役領軍
先登遂拔其壘二年四月下徐州梟時溥存節力戰其
功居多乾寧二年授檢校工部尙書三年夏太祖東討
鄆州存節領軍次故樂亭扼其要路都指揮使龐師古

屯馬頰存節密與都將王言謀入鄆壘十二月存節遣
王言夜伏勇士于州西北以船踰濠舉梯登陴旣而王
言不克入存節獨率伏軍負梯輦破其西甕城尋與濠
橋諸軍俱進四年四月陷其城尋與葛從周降下兗州
加檢校右僕射其年秋大舉以伐淮南至濠州東聞前
軍失利于清口諸軍退至淝河無復隊伍存節遏其後
諸將釋騎步鬪諸軍稍得濟收合所部並敗兵共八千
餘人至于淮涘時不食已四日矣存節訓勵部分以禦
追寇遂得旋師

案舊唐書昭宗紀葛從周自霍邱渡淮至濠州聞師古敗乃退軍信宿至淝河

方渡而朱瑾至是日殺傷溺死殆盡還者不滿千人惟

牛存節一軍先渡獲免北至潁州大雪寒冬死者十五

六據舊唐書存節以渡得免而薛史以爲存節過其後蓋傳聞之異五年除亳州刺史俄

遷宣武軍都指揮使改宿州刺史明年淮賊大至彭城存節乃以部下兵夜發直趨彭城淮人訝其神速震恐而退諸將服其智識光化二年罷歸復爲左衙都將兼馬步教練使天復元年授潞州馬步軍都指揮使法令嚴整士庶安之及追赴行在士卒泣送者不絕于道加金紫光祿大夫檢校司空改滑州左衙步軍指揮使知邢州軍州事天祐元年授邢州團練使時州兵纜及二百人晉人知之以大軍來寇太祖在鄴發長直兵二千人赴援存節率壯健出鬪以家財賞激戰士弁軍急攻

七日不能克而去太祖召至勞慰久之厚賚金帛鞍馬
加檢校司徒冬罷軍署爲元帥府左都押衙四年太祖
受禪除右千牛衛上將軍其秋攻潞州以存節爲行營
馬步軍都排陣使開平二年二月自右監門衛上將軍
轉右龍虎統軍駐留洛下是歲王師敗于上黨晉人乘
勝進迫澤州州城將陷河南留守張全義召存節謀遂
以本軍及右龍虎羽林等軍往應接上黨師至天井關
存節諸將曰是行也雖不奉詔旨然要害之地不可致
失時晉人新勝其鋒甚盛存節引眾而前銜枚夜至澤
州適遇守陴者已縱火鼓噪以應外軍刺史保衙城不

知所爲存節纔入晉軍已至矣乃分布守禦晉軍四面
攻鬪開地道以入城存節亦以隧道應之逆戰于地中
晉軍不能進又以勁弩射之中者人馬皆洞經十三日
晉軍死傷者甚眾焚營而退郡以獲全太祖屢歎賞之
五月遷左龍虎統軍充六軍馬步都指揮使十月授絳
州刺史三年四月除鄜州留後六月劉知俊以同州叛
尋授同州留後未幾加檢校太保同州節度使乾化二
年加檢校太傅進封開國公存節戒嚴軍旅常若敵至
先是州中井水鹹苦人不可飲及并人岐人來迫州城
或以爲兵士渴乏陷在旦夕存節乃肅拜虔祝擇地鑿

八十餘井其味皆甘淡由是人馬汲灌有餘

案八竦集引薛史作

存節鑿八十餘井味皆甘淡病渴俱消疑引薛史而稍有移易也

眾以爲至誠之感自

八月至三年春末人馬未嘗釋甲以至寇退尋加同平章事詔赴闕末帝召慰勉賞賜甚厚十一月加開府儀同三司食邑一千戶授鄆州節度使四年加淮南西北面行營招討使控扼淮瀆邊境安之其冬蔣殷據徐州逆命存節方以大眾戍潁州得殷逆謀密以上聞遽奉詔與劉鄩同討之頓于埆上淮賊朱瑾以兵救殷距宿之兩舍聞存節兵大至卽委糧棄甲而遁竟平徐州詔加太尉夏中病渴且瘠屬河北用軍末帝令率軍屯陽

留

案陽留卽楊劉見通鑑考異又考李重進碑作楊留蓋地名通用

以張劉鄩之勢存

節忠憤彌篤未嘗言病料敵治戎旦夕愈厲病革詔歸汝陽翼日而卒將終戒其子知業知讓等以忠孝言不及他冊贈太師存節武鷲慷慨有大節野戰壁守皆其所長威名聞其境外深爲末帝所重而木強忠厚有賈

復之風焉

永樂大典卷八千八百六十一

王檀字眾美京兆人也曾祖泚唐左金吾衛將軍隴州防禦使祖曜定難功臣渭橋鎮遏使父環鴻臚卿以檀貴累贈左僕射檀少英悟美形儀好讀兵書洞曉韜畧唐中和中太祖鎮大梁檀爲小將四年汴將楊彥洪破

巢將尙讓李謙于尉氏門外檀在戰中摧鋒陷陣遂爲
太祖所知稍蒙擢用預破蔡賊于斤溝淝河八角遷踏
白都副將光啟二年從胡真擊淮西之眾解河陽之圍
蔡賊張存敢乘亂據洛陽檀與勇士數十人潛入賊柵
邀其輜重存敢遁走胡真至陝州開通貢路遣檀攻玉
山寨降賊帥石令殷從擊秦宗賢于鄭州西北河灘之
上于太祖馬前射賊將孫安應弦而斃三年佐都指揮
使朱珍敗徐戎于孫師陂獲其將孫用和束詡以獻從
擊蔡賊于板橋偏將李重膺追賊馬躡爲蔡人所擒檀
奪取而旋獲賊將薛注太祖破朱瑾于劉橋檀盡收其

軍實文德元年三月討羅弘信敗魏人于內黃檀獲其

將周孺邵神劍以歸補衝山都虞候案原本作衝山今從歐陽史改正

是歲與諸軍平蔡州明年佐朱珍大破時溥之眾檀獲

賊將何肱改左踏白馬軍副將預征兗鄆累立戰功大

順元年從龐師古渡淮深入討孫儒之亂奪邵伯堰破

高郵軍檀奮命擊賊刃傷左臂未幾遷順義都將天復

中從太祖率四鎮之師圍鳳翔以迎昭宗屢立戎効遷

左踏白指揮使從攻王師範于青州檀以偏師收復密

郡承陽志云張訓守密州刺史朱全忠至青州訓謂諸將曰汴人將至何以禦之諸將請焚城大掠而歸訓

日不可乃封府庫植旗幟于城上遣羸弱居前自以精兵殿其後而去全忠遣王檀攻密州數日乃敢入城

遂權知軍州事充本州馬步軍都指揮使尋表授檢校
右僕射密州刺史郡接淮戎舊無壁壘乃率夫修築羅
城六旬而畢居民賴之加檢校司空開平二年六月授
邢州保義軍節度使檢校司徒三年加檢校太保充潞
州東北面行營招討使乾化元年正月王景仁與晉人
戰于栢鄉王師敗績河朔大震景仁餘眾爲敵騎所追
檀嚴設備應接敗軍助以資裝獲濟者甚眾俄而晉軍
大至重圍四合土山地穴晝夜攻擊太祖憂之檀密上
表請駕不親征而悉力枝梧竟全城壘三月以功就加
檢校太傅同平章事七月又加開府儀同三司檢校太

尉追封瑯琊郡王命宣徽使趙殷衡賚詔慰諭賜絹千疋銀千兩賞守禦邢州之功也庶人友珪僭位授鄧州宣化軍節度使檢校太尉兼侍中末帝卽位移授許州匡國軍節度使加檢校太師五年蔡州刺史王彥溫作亂檀受詔討平之加兼中書令貞明元年三月魏博軍亂六月晉王入魏州分兵收下屬郡河北大擾檀受詔與開府尹劉鄩犄角進師以援河北檀攻澶州魏縣下之擒賊將李巖王開關以獻頃之檀密疏請以奇兵西趨河中自陰地關襲取晉陽末帝許之卽馳兵而去二年二月師至晉陽晝夜急攻其壘并州幾陷旣而蕃將

石家才自潞州以援兵至檀引軍大掠而還尋授天平
 軍副大使知節度使事充鄆齊魯曹等州觀察等使先
 是檀招誘羣盜選其强悍者寘于帳下以為爪牙至是
 數輩竊發突入府第檀素不為備遂為所害時年五十
 一節度副使裴彥聞變率府兵盡擒諸賊州城帖然尋
 册贈太師諡曰忠毅葬于開封縣之臯門原有子六人
 皆升朝列永樂大典卷六千八百五十

史臣曰夫大都偶國春秋所非當師厚之據鄴城也綰
 數萬之甲兵擅六州之輿賦名既震主勢亦滔天逮其
 喪亡須議分割由茲以失河朔因是以啟晉人詩所謂

生誰厲階者師厚之謂歟存節王檀俱出身事主抵力
圖功觀其方畧皆將帥之良者也

永樂大典卷六
千八百五十

舊五代史卷二十二終

舊五代史卷二十二攷證

梁列傳十二楊師厚傳晉軍扼蒙阮之險 阮原本作
阮攷通鑑注云蒙阮在汾水之東東西三百餘里蹊
徑不通卽此處也今改正

晉人乃徹圍而遁 案通鑑攷異引梁實錄云生擒賊
將蕭萬通等賊由是棄寨而遁莊宗實錄云汴軍至
蒙阮周德威逆戰敗之二軍各言勝捷其互異如此
通鑑從是書

牛存節傳牛存節字贊貞 贊貞原本作替貞夏文莊
集引薛史又作潛真今據歐陽史改正

舊五代史卷二十二 五十一

大破賊于淇河 淇河原本訛洑河今據歐陽史及通

鑑改正

舊五代史卷二十二攷證

舊五代史卷二十三

宋司空同中書門下平章事薛居正等撰

列傳第十三

梁書二十三

劉鄩密州安丘縣人也祖綬密州戶掾累贈左散騎常侍父融安丘令累贈工部尚書鄩幼有大志好兵畧涉獵史傳唐中和中事青州節度使王敬武爲小校敬武卒三軍推其子師範爲留後朝廷命崔安潛鎮青州州人拒命棣州刺史張蟾將襲師範師範遣都指揮使盧弘攻棣州弘反與蟾通僞旋軍以襲師範師範知之設伏兵以迎弘旣而享之先誡鄩曰弘至卽斬之鄩如約

斬弘于座上同亂者皆誅之師範以鄴爲馬步軍副都
指揮使攻下棣州殺張蟾朝廷因授師範平盧軍節度
使光化初師範表鄴爲登州刺史歲餘移刺淄州署行
軍司馬天復元年昭宗幸鳳翔太祖率四鎮之師奉迎
于岐下李茂貞與內官韓全誨矯詔徵天下兵入援師
範覽詔慷慨泣下遣腹心乘虛襲取太祖管內州郡所
在同日竊發其事多泄唯鄴以偏師陷兗州遂據其郡
初鄴遣細人詐爲鬻油者覘兗城內虛實及出入之所
視羅城下一水竇可以引眾而入遂誌之鄴乃告師範
請步兵五百宵自水竇銜枚而入

案金華子云鄴以大
竹藏兵仗與薛史異

一夕而定軍城晏然市民無擾

金華子云鄴入據子城甲兵精銳城內人皆束

手莫敢旅拒加以州將悍虐人情不附鄴因而撫治民皆安堵

大祖命大將葛從周攻

之

案金華子作克帥張姓疑傳聞之誤

時從周爲節度使領兵在外州城

爲鄴所據家屬悉在城中鄴善撫其家移就外第供給有禮升堂拜從周之母及從周攻城鄴以板輿請母登城母告從周曰劉將軍待我甚至不異于兒新婦已下並不失所劉將軍與爾各爲其主爾其察之從周歛獻而退鄴乃簡城中老疾及婦人浮食百姓不足與守者悉出之于外與將士同甘苦分衣食以抗外軍戢兵禁暴居人泰然從周攻圍旣久鄴無外援人情稍有去就

之意一日節度副使王彥溫踰城而奔守陴者從之而逸鄴之守兵禁之不可鄴卽遣人從容告彥溫曰請副使少將人出非素遣者請勿帶行又揚言于眾曰素遣從副使者卽勿禁其擅去者族之守民聞之皆惑奔逸者乃止外軍聞之果疑彥溫有姦卽戮之于城下自是軍城遂固及王師範兵力漸窘從周以禍福諭鄴俾之革面鄴報曰俟青州本使歸降卽以城池還納天復三年十一月師範告降且言先差行軍司馬劉鄩領兵入兗州請釋其罪亦以告鄴鄴卽出城聽命太祖嘉其節槩以爲有李英公之風鄴卽降從周具行裝服馬請

鄴歸大梁鄴曰未受梁王捨釋之旨乘肥衣裘非敢聞命卽素服跨驢而發及將謁見太祖令賜冠帶鄴曰纍囚負罪請就繫而入太祖不許及見慰撫移時且飲之酒鄴以量小告太祖太祖曰取兗州量何大也旋授元從都押衙太祖牙下諸將皆四鎮舊人鄴一旦以羈旅之臣驟居眾人之右及與諸將相見並用階庭之禮太祖尤奇重之未幾表爲鄆州留後是時邠岐之眾屢寇其境鄴禦捍備至太祖以其地遠慮失鄴卽令棄郡引軍屯于同州天祐二年二月授右金吾衛大將軍充街使三年正月太祖授元帥之任以鄴爲元帥府都押牙

執金吾如故開平元年授右金吾上將軍充諸軍馬步
都指揮使其年秋與諸將征潞州遷檢校司徒三年二
月轉右威衛上將軍依前諸軍馬步都虞候五月改左
龍武統軍充侍衛親軍馬步軍都指揮使其年夏同州
劉知俊反引岐人襲據長安分兵扼河潼太祖幸陝命
鄴西討卽奮取潼關擒知俊弟知浣以獻遂引兵收復
長安知俊棄郡奔鳳翔太祖以鄴爲佑國同州軍兩使
留後尋改佑國軍爲永平軍以鄴爲節度使檢校司徒
行大安尹金州管内觀察使是時西鄙未寧密邇寇境
鄴練兵撫眾獨當一面四年加檢校太保同平章事庶

人友珪篡位加檢校太傅乾化三年正月丁內艱友珪命起復視事末帝卽位尤深倚重明年夏詔鄴歸闕授開封尹遙領鎮南軍節度使旋屬晉人寇河朔鄴奉詔與魏博節度使楊師厚禦之而退九月徐州節度使蔣殷據城叛時朝廷以福王友瑋鎮徐方殷不受代末帝遣鄴與鄆帥牛存節率兵攻之殷求援于淮夷僞吳楊溥遣大將朱瑾領眾赴援鄴逆擊破之貞明元年春城陷殷舉族自燔于火中得其尸梟首以獻詔加檢校太尉三月魏博楊師厚卒朝廷分相魏爲兩鎮遣鄴率大軍屯南樂以討王鎔爲名旣而魏軍果亂囚節度使賀

德倫送款于太原六月晉王入魏州鄴以精兵萬人自

洹水移軍魏縣晉王來覘鄴設伏于河曲叢木間俟晉

王至大噪而進圍之數匝殺獲甚眾晉王僅以身免案通鑑

鑑作晉王率騎馳突所向披靡自午至申乃得出亡其

七騎而薛史以為殺獲甚眾晉王僅以身免蓋當時梁

唐二史各有夸張掩飾故所紀互異如此通鑑所載當是據唐實錄是月鄴潛師由黃澤

西趨太原將行慮為晉軍所追乃結芻為人縛旗于上

以驢負之循堞而行數日晉人方覺軍至樂平會霖雨

積旬師不克進鄴即整眾而旋魏之臨清積粟之所鄴

引軍將據之遇晉將周陽五自幽州率兵至鄴乃取貝

州與晉軍遇于堂邑鄴邀擊却之追北五十餘里遂軍

于莘縣增城壘浚池隍自莘及河築甬道以通饒路八月未帝賜鄴詔曰閩外之事全付將軍河朔諸州一旦淪沒勞師弊旅患難日滋退保河壩久無鬪志昨東面諸侯奉章來上皆言倉儲已竭飛輓不充于役之人每遭擒擄夙宵軫念惕懼盈懷將軍與國同休當思良畫如聞寇敵兵數不多宜設機權以時翦撲則予之負荷無累先人鄴奏曰臣受國深恩忝茲閩政敢不枕戈假寐罄節輸忠昨者比欲西取太原斷其歸路然後東收鎮冀解彼連鷄止于旬時再清河朔豈期天方稔亂國難未平纔出師徒積旬霖潦資糧殫竭軍士札瘥切慮

蒼黃乖于統攝乃詢部伍皆欲旋歸凡次舍經行每張
犄角又欲絕其饗道且據臨清纜及宗城周陽五奄至
騎軍馳突變化如神臣遂領大軍保于莘縣深溝高壘
享士訓兵日夜戒嚴伺其進取偵視營壘兵數極多樓
煩之人皆能騎射最爲勁敵未可輕謀臣若苟得機宜
焉敢坐滋患難臣心體國天鑒且明末帝又遣使問鄒
決勝之策鄒曰臣無奇術但人給糧十斛盡則破敵末
帝大怒讓鄒曰將軍蓄米將療饑耶將破賊耶乃遣中
使督戰鄒集諸校而謀曰主上深居宮禁未曉兵機與
白面兒共謀終敗人事大將出征君命有所不受臨機

制變安可預謀今揣敵人未可輕動諸君更籌之時諸將皆欲戰鄴默然他日復召諸將列坐軍門人具河水一器因命飲之眾未測其旨或飲或辭鄴曰一器而難若是滔滔河流可勝既乎眾皆失色居數日鄴率萬餘人薄鎮定之營時鄴軍奄至上下騰亂殺獲甚眾少頃晉軍繼至乃退二年三月鄴自莘引軍襲魏州與晉王戰于故元城王師敗績鄴脫身南奔自黎陽濟河至滑州尋授滑州節度使詔屯黎陽三年二月晉王悉眾來攻黎陽鄴拒之而退及鄴歸闕再授開封尹領鎮南軍節度使其年河朔失守朝廷歸咎于鄴亦不自安上表

避位九月落平章事授亳州團練使屬淮人寇蔡穎亳
三郡鄆奉命渡淮至霍丘大殲賊黨五年兗州節度使
張萬進反北結晉人爲援末帝遣鄆攻之鄆爲兗州安
撫制置使是冬萬進危賊小將邢師遇潛應王師遂拔
其城梟萬進首以獻十一月制授泰寧軍節度使檢校
太尉同平章事六年六月授河東道招討使與華州尹
皓攻取同州先是河中朱友謙襲取同州以其子令德
爲留後表請旄鉞末帝怒命鄆討之其年九月晉將李
嗣昭率師來援戰于城下王師不利敗兵走河南橋梁
陷溺死者甚眾鄆以餘眾退保華州羅文寨先是鄆與

河中朱友謙爲婚家及王師西討行次陝州鄆遣使賈

檄與友謙諭以禍福大計誘令歸國友謙不從如是停

留月餘尹皓段凝輩素忌鄆遂構其罪言鄆逗留養寇

俾俟援兵末帝以爲然及兵敗詔歸洛河南尹張宗奭

承朝廷密旨逼令飲酖而卒

案通鑑考異引莊宗實錄云憂恚發病卒通鑑從薛

史時年六十四詔贈中書令子遂凝遂雍別有傳

永樂大典

卷一萬八千一百二十六

賀瓌字光遠濮陽人也曾祖延以瓌貴贈左監門上將

軍祖華贈左散騎常侍父仲元贈刑部尙書瓌少倜儻

負雄勇之志遇世亂入軍朱瑄爲濮州刺史兼鄆州馬

步軍都指揮使拔爲小將唐光啟初鄆州三軍推瑄爲留後以瓌爲馬步軍都指揮使表授檢校工部尙書及瑄與太祖構隙瓌受瑄命數領軍于境上乾寧二年十月太祖親征兗鄆十一月瑄遣瓌與太原將何懷寶率兵萬餘人以援朱瑾師次待賓館斷我糧運太祖偵知之自中都引軍夜馳百餘里遲明至鉅野東與瓌等接戰兗人大敗瓌竄于棘塚之上大呼曰我是鄆州都將賀瓌願就擒幸勿傷也太祖聞之騎馳至塚前遂擒之并獲何懷寶及將吏數十人徇于兗壁之下悉命戮之唯留瓌一人釋縛竄之麾下尋署爲教練使奏授檢校

左僕射瓌感太祖全宥之恩私誓以身報國天復中預
平青州王師範以功授曹州刺史兼先鋒都指揮使加
檢校司空天祐二年與楊師厚從太祖平荆襄授荆南
兩使留後未幾徵還爲行營左廂步軍都指揮使開平
二年十月授左龍虎軍馬步都指揮使十二月改左衛
上將軍充六軍馬步都虞候三年五月轉右龍虎統軍
未幾加檢校司徒邢州團練使四年二月改澤州刺史
充昭義軍節度使後檢校太保進封開國侯乾化二年
七月授相州刺史尋加檢校太傅有頃轉左龍虎統軍

案歐陽史太祖卽位累遷相州刺史末帝時遷左龍虎
統軍據薛史瓌遷統軍不繫年月歐陽史特以太祖時

左龍虎統軍有袁象
先而揣度言之耳

貞明二年慶州叛爲李繼陟所據

瓌以本官充西面行營馬步軍都指揮使兼諸軍都虞
候與張筠破涇鳳眾三萬下寧衍二州三年秋慶州平
十二月瓌以功授滑州宣義軍節度使依前檢校太傅
加同平章事尋授北面行營招討使四年春晉人取楊
劉城據之八月瓌與許州節度使謝彥章領大軍營于
濮州之行臺村對壘數月一日晉王以輕騎挑戰瓌與
彥章發伏兵奮擊晉王僅以身免先是瓌與彥章不協
是歲冬十二月復爲諸軍都虞候朱珪所構瓌乃伏甲
士殺彥章及濮州刺史孟審澄別將侯溫裕等于軍以

謀叛聞是月瓌與晉人大戰于胡柳坡晉人敗績臨陣

斬晉將周陽五既捕瓌軍亦敗

案歐陽史瓌陣無石山日暮晉軍攻之瓌軍下

山擊晉軍瓌大敗據薛史莊宗紀與王建及傳乃是山為晉軍所奪晉軍下山擊瓌軍瓌大敗與歐陽史異

五年春正月晉人城德勝夾河為柵四月瓌率大軍攻

其南柵以縲艦戰艦扼其中流晉人斷我縲艦濟軍以

援南柵瓌退軍于行臺尋以疾卒時年六十二詔贈侍

中長子光圖仕後唐為供奉官

永樂大典卷一萬八千一百二十七

康懷英兗州人也本名懷貞避末帝御名故改之始以

驍勇事朱瑾為列校唐乾寧四年春太祖既平鄆命葛

從周乘勝急攻兗州時朱瑾在豐沛間搜索糧饟留懷

英守其城及從周軍至懷英聞鄆失守乃出降太祖素聞其名得之甚喜尋署爲軍校光化元年秋從氏叔琮伐襄漢懷英以一軍攻下鄧州三年從征河朔佐張存敬敗燕軍于易水之上天復元年冬太祖率師迎昭宗于鳳翔時李茂貞遣大將符道昭領兵萬餘屯武功以拒太祖命諸軍擊之以懷英爲前鋒領眾先登一鼓而大破之虜甲士六千餘人奪馬二千匹翌日太祖方至顧左右曰邑名武功今首盪逆黨真武功也乃召懷英大加獎激仍以駿馬珍器賜之二年四月符道昭復領大軍屯于虢縣之漠谷其建寨之所前臨巨澗後倚峻

阜險不可升太祖遣懷英提騎數千急擊之道昭以懷
英兵寡有俯視之意乃率甲士萬人絕澗以挑戰懷英
始以千騎夜鬪戰酣發伏以擊之岐軍大敗秋八月鄜
帥李周彝屯軍于三原以援鳳翔太祖命懷英討之周
彝拔軍而遁追至梨園因攻下翟州擒其守來獻俄而
岐軍屯奉天太祖令懷英寨于岐軍之東北以備敵人
一夕岐軍大至急攻其營懷英以夜中不可驚動諸軍
獨以二千餘人抗數萬之眾自乙夜至四鼓身被十餘
創岐軍不勝而退昭宗還京賜迎鑾毅勇功臣是歲淮
人聞青兗之叛遣兵數萬以寇宿州太祖命懷英馳騎

以救之淮人遁去卽以懷英爲權知宿州刺史天祐三年冬佐劉知俊破邠鳳之眾五萬于美原收五十餘寨乘勝引軍攻下鄜州以功授陝州節度使太祖受禪加檢校太保開平元年夏命將大軍以伐潞州將行太祖謂懷英曰卿位居上將勇冠三軍向來破敵摧鋒動無遺悔至于高爵重祿我亦無負于卿夫忠臣事君有死無二韓信所謂漢王載我以車衣我以衣食我以食食人之祿死人之憂我每思韓信此言眞忠烈丈夫耳如丁會受我待遇之恩不謂不至懷黃拖紫列土分茅設令木石偶人須感恩義一朝反墜倒戈授人苟有天道

明神安能容此大凡辜恩負理忠良不爲我今掃境內
委卿卿當勉思竭盡况晉人新得上黨眾心未協和以
十萬之師一舉可克予當置酒高會望卿歌舞凱旋懷
英惶恐而退六月懷英領大軍至潞率眾晝夜攻城半
月之間機巧百變懷英懼太祖之言期于必取乃築壘
環城濬鑿池塹然而屢爲晉將周德威騎軍所撓懷英
不敢卽戰太祖乃以李思安代之降爲行營都虞候夏
五月晉王率蕃漢大軍攻下夾城懷英逃歸詣銀臺門
待罪太祖宥之改授右衛上將軍三年夏命爲侍衛諸
軍都指揮使尋出爲陝州節度使兼西路行營副招討

使及劉知俊奔鳳翔引岐軍以圖靈武太祖遣懷英率

兵救之師次長城嶺為知俊邀擊懷英敗歸

案歐陽史云還至昇

平知俊掩擊之懷英大敗據通鑑懷貞等還至三水知俊遣兵據險邀之左龍驤軍使壽張王彥章力戰懷貞等乃得過懷貞與裨將李得遇許從實王審權分道而行皆與援兵不相值至昇平劉知俊伏兵山口懷貞大敗僅以身免德遇等軍皆沒蓋懷英過長城嶺之險已為邀擊後又敗于昇平也

四年春移華

州節度使乾化二年秋命為河中行營都招討使與晉

軍戰于白徑嶺敗歸于陝末帝嗣位以岐軍屢犯秦雍

命懷英為永平軍節度使大安尹累加官至中書令貞

明中卒于鎮

永樂大典卷一萬八千一百二十六

王景仁

案景仁本名茂章避梁諱改焉詳見通鑑注

廬州合淝人材質魁偉

性暴率無威儀善用槩頗推驍悍在淮南累職爲都指

揮使楊行密僞署宣州節度使行密死子渥自立忌其

勇悍且有私憾欲害之案新唐書楊行密傳渥求茂章

親兵不得宣輦帷帟以行茂章之茂章奔杭州與薛史異景仁棄宛陵以腹心百人

歸吳越王錢鏐鏐辟爲兩府行軍司馬具以狀聞太祖

復命選領宣州節度使檢校太傅同平章事鏐以淮寇

終爲巨患欲速平之命景仁奉表至闕面陳水陸之計

請合禁旅太祖異禮待之頒賜殊厚顧曰待我平代北

寇當盡以王師付汝南討于是留京師每預丞相行列

劉知俊之叛也從駕至陝始佐楊師厚西入關兵未交

唐五代史卷之三十三

知俊棄馮翊走進尅雍華降王建張君練頗預戰有功
太祖嘉之時鎮定作逆朋附蕃醜遂擢爲上將付步騎
十萬爲北面行營都招討使開平二年正月二日與晉
軍戰于栢鄉王師敗績太祖怒甚拘之私第然以兩浙
元勳所薦且欲收復其後効止落平章事罷兵柄而已

案歐陽史景仁與晉人戰大敗于栢鄉景仁歸訴于太祖
太祖曰吾亦知之蓋韓勅李思安輕汝爲客而不從
節度爾與薛史異數月復其官爵末帝卽位復用爲南面北面

行營招討應接使以兵萬餘人伐壽州至霍丘接戰擒
賊將袁藜王彥威王蕃等送京師俄而朱瑾以大軍至
景仁力戰不屈常以數騎身先奮擊寇不敢逼乃引兵

還及濟淮復爲殿軍故不甚劔瑾亦不敢北渡

案九國志朱景

傳王茂章來寇度淮水可涉處立表識之景易置于深

潭水中立表浮水之上茂章軍敗望表而涉溺死者大半積其尸爲京觀是景仁實以敗歸傳

云歸不甚劔蓋薛史爲景仁諱言也

及歸病疽而卒

詔贈太尉

永樂大典卷六千八百五十

史臣曰劉鄩以機略自負賀瓌以忠義見稱懷英以驍

勇佐時景仁以貞純許國較其器業皆名將也然雖有

善戰之勞亦有敗軍之咎則知兵無常勝豈虛言哉然

鄩之據兗州也盡誠于師範比跡于英公方之數侯加

一等矣

永樂大典卷六千八百五十

舊五代史卷二十三終

舊五代史卷二十三攷證

梁列傳十三劉鄩傳朝廷命崔安潛鎮青州 安潛原

本訛守潛今據新唐書改正

鄩卽出城聽命 案劉鄩叛附于梁新唐書昭宗紀作

十月丁丑與是書作十一月異

以爲有李英公之風 英公原本訛殷公攷新唐書李

勳封英國公今改正

賀瓌傳張筠破涇鳳之眾三萬 張筠原本訛張節今

據通鑑攷異改正

別將侯溫裕等 侯溫裕玉堂閒話作侯溫疑傳聞之

吳

舊五代史卷二十三攷證

舊五代史卷二十四

宋司空同中書門下平章事薛居正等撰

列傳第十四

梁書二十四

李珽字公度隴西燉煌人五世祖忠懿公愷有大節見唐史父穀仕懿僖朝官至右諫議大夫珽聰悟有才學尤工詞賦僖宗朝晉公王鐸提兵柄鎮滑臺穀居賓席鐸見珽大賞歎之年二十四登進士第解褐授校書郎拜監察御史俄丁內艱先是父旅殯在遠家貧無以襄事與弟琪當臘雪以單纓扶杖銜哀告人由是兩克遷祔而珽日不過食一溢恆羸臥喪廬中不能興大爲時

賢所歎憂闕再徵爲御史以瘠不起成汭之鎮荊州辟
爲掌書記踰時乃就天復中淮寇大舉圍夏口逼巴陵
太祖患之飛命成汭率水軍十萬援于鄂珽入言曰今
舳艫容甲士千人載稻倍之緩急不可動吳人剽輕若
爲所絆則武陵武安皆我之讎也將有後慮不如遣驍
將屯巴陵大軍對岸一月不與戰則吳寇糧絕而鄂州
圍解矣汭性剛決不聽淮人果乘風縱火舟盡焚兵盡
溺汭亦自沉于江朗人潭人遂入荆渚一如所料未幾
襄帥趙匡凝復奏爲掌記入爲左補闕又明年太祖爲
元帥以襄陽貳于已率兵擊破之趙匡凝奔揚州太祖

復署珽爲天平軍掌書記一日大會將佐指珽曰此眞書記也滄州節度使劉守文拒命太祖引兵十餘萬圍之久而未下乃召珽草檄珽卽就外次筆不停綴登時而成大爲太祖嗟賞受禪之歲宰臣除爲考功員外郎知制誥珽揣太祖未欲首以舊僚超拜清顯三上章固辭優詔褒允尋以本官監曹州事曹去京數舍吏民豪猾前後十餘政未有善罷者珽在任期歲眾庶以寧入爲兵部郎中崇政院學士未幾以許帥馮行襲疾甚出爲許州留後先是行襲有牙兵二千皆蔡人也太祖深爲憂乃遣珽馳往以伺察之珽至傳舍召將吏親加撫

慰行襲欲使人代受詔珽曰東首加朝服禮也乃于臥
內宣詔令善自補養苟有不諱子孫俱保後福行襲泣
謝遂解二印以授珽代掌軍府事太祖覽奏曰予固知
珽必辦吾事行襲門戶不朽矣乃以珽爲匡國軍留後
尋徵爲左諫議大夫兼宣徽副使從征至魏縣過內黃
因侍立于行廡太祖顧曰此何故名內黃珽曰河南有
外黃小黃故此有內黃又曰在何處對曰秦有外黃都
尉理外黃有墉今在雍丘小黃爲高齊所廢其故墉今
在陳留太祖稱獎數四及庶人友珽篡位除右散騎常
侍充侍講學士內討之日軍士大擾珽其夕爲亂兵所

傷卒于洛陽珽性孝友與弟琪有敦睦之愛為搢紳所

稱

永樂大典卷一萬三百八十八

案歐陽

史有裴廸韋震傳今原文已佚無可采補

盧曾字孝伯其先范陽人也頗好書有所執守始為齊

州防禦使朱瓊從事

案新唐書通鑑與薛史梁紀皆稱朱瓊為齊州刺史惟盧曾傳作防

禦使疑有舛誤

瓊降預其謀與之皆來瓊沒太祖辟為宣義幕

職曾性忠狷好貢直又不能取容于眾每勳府讌語稍

洽曾率然糾正輒又忤旨左長直軍使劉捍委任方重

曾亦不能平冀王友謙初定陝府命曾往議事有使院

小將從行嗜酒荒逸過度曾復命欲發其罪致疏于袖

中累日未果言小將恐事泄先誣告曾使酒幾敗軍事

劉捍因證之由是罷職歸于齊之別墅俄而王師範起
兵叛太祖促召曾謂之曰子能緩頰說青州使無背盟
吾不負子矣曾持檄以往既至青師範囚之送于淮南
遇害後太祖暴師範之罪曰喪我骨肉殺我賓僚遂族
誅之因召曾二子皆授以官

永樂大典卷二
千二百十二

孫隲滑臺人嗜學知書微有辭筆唐光啟中魏從事公
乘億以女妻之因教以牋奏程式時中原多難文章之
士縮影竄跡不自顯億既死魏帥以章表牋疏淹積兼
月不能發一字或以隲爲言卽署本職主奏記事累遷
職自支使掌記至節度判官奏官自校書御史郎官中

丞檢校常侍至兵部尙書太祖御天下念潛龍時騰奏
其主好問往來數十返甚錄之開平三年除右諫議大
夫滿歲遷左散騎常侍騰雅好聚書有六經漢史洎百
家之言凡數千卷皆簡翰精至披勘詳定得暇卽朝夕
耽翫曾無少怠乾化二年春太祖將議北巡選朝士三
十餘人扈從二月甲子車駕發自洛陽禹中次白馬頓
召文武官就食以從臣未集駐蹕以俟之命飛騎促于
道而騰與諫議大夫張衍兵部郎中張儁等累刻方至
太祖性本卞急因茲大怒並格殺于前墀

永樂大典卷
三千五百六

十

張儁字彥臣祖父咸有聞于時儁少孤自修飭善爲五
言詩其警句頗爲人所稱唐廣明中黃巢犯京師天子
幸蜀士皆竄伏窟穴以保其生儁亦晦跡浮泛不失其
道及僖宗還京師由校書郎西畿尉登朝爲御史補闕
起居郎司勳員外萬年縣令以事黜官峽中將十年太
祖卽位用宰臣薛貽矩爲鹽鐵使儁與貽矩同年登第
甚知其才卽奏爲鹽鐵判官遷職爲禮部郎中兼職如
故乾元二年二月扈從後至與孫隲張衍同日遇禍于
白馬頓

永樂大典卷六
千三百二十

張衍字元用河南尹魏王宗奭之猶子也其父死于兵

間衍樂讀書爲儒始以經學就舉不中選時諫議大夫
鄭徽退居洛陽以女妻之遂令應辭科不數上登第唐
昭宗東遷以宗奭勳力隆峻衍由校書郎拜左拾遺旋
召爲翰林學士太祖卽位罷之特拜考功郎中俄遷右
諫議大夫衍巧生業樂積聚太祖將北伐頗以扈從間
糜耗力用繫意屢干託宰執求免是行太祖微聞之又

屬應召稽晚與孫隲等同日遇禍永樂大典卷六千三百五十一

杜荀鶴池州人案辛文房唐才子傳荀鶴字彥之牧之微子也善爲詩辭句切

理爲時所許旣擢第復還舊山案唐才子傳荀鶴嘗謁梁王朱全忠與之坐忽

無雲而雨王以爲天泣不祥命作詩稱意王喜之荀鶴
寒進連敗文場甚苦至是送春官大順二年裴贄侍郎

放第八人登科正月十日放榜正荀鶴生朝也王希羽
獻詩曰金榜曉懸生世日玉書潛記上昇時九華山色
高千尺未必高于第八枝又唐新纂云荀鶴舉進士及
第東歸過夷門獻梁太祖詩句云四海九州空第一不
同諸鎮府封王是則荀鶴之受知于梁祖
舊矣不待田頽之箋問而始被知遇也
時田頽在宣

州甚重之頽將起兵乃陰合以箋問至太祖遇之頗厚

及頽遇禍太祖以其才表之尋授翰林學士主客員外

郎既而恃太祖之勢凡搢紳間已所不悅者日屈指怒

數將謀盡殺之苞蓄未及泄丁重疾旬日而卒
永樂大典卷一

萬五千七百三十案唐才子傳荀鶴以天祐元年卒
北夢瑣言又作受禪後拜翰林學士五日而卒未詳孰
是

羅隱餘杭人
案澗泉日記詩名于天下尤長于詠史然

多所譏諷以故不中第大為唐宰相鄭畋李蔚所知隱雖負文稱然貌古而陋畋女幼有文性嘗覽隱詩卷諷誦不已畋疑其女有慕才之意一日隱至第鄭女垂簾而窺之自是絕不詠其詩唐廣明中因亂歸鄉里節度

使錢鏐辟為從事

案唐新纂羅隱初為吳令後以羅紹威薦為錢鏐所辟據薛史則隱自歸

里即為鏐從事後復為紹威薦也與新纂異

開平初太祖以右諫議大夫徵

不至魏博節度使羅紹威密表推薦乃授給事中年八

十餘終于錢塘

澗泉日記云唐光啟三年吳越王表奏為錢塘令遷著作郎辟掌書記天祐三

年充判官梁開平二年授給事三年遷發運使是年卒葬于定山鄉金部郎中沈崧銘其墓

有文集

數卷行于世

永樂大典卷五千六百七十八唐才子傳云隱所著讒書讒本淮海寓言湘南應

用集甲乙集外集啟事等並行于世五代史補羅隱
在科場恃才傲物尤為公卿所惡故六舉不第時長安
有羅尊師者深于相術隱以貌陋恐為相術所棄每與
尊師接談常自大以沮之及其累遭黜落不得已始往
問焉尊師笑曰貧道知之久矣但以吾子決在一第未
可與語今日之事貧道敢有所隱乎且吾子之干一第
也貧道觀之雖首冠羣英亦不過簿尉爾若能舉東
歸霸國以求用則必富且貴矣兩途吾子宜自擇之隱
懵然不知所措者數日鄰居有賣飯媪見隱驚曰何辭
色之沮喪如此莫有不決之事否隱謂知之因盡以尊
師之言告之媪歎曰秀才何自迷甚焉且天下皆知羅
隱何須一第然後為得哉不如急取富貴則老妻之願
也隱聞之釋然遂歸錢塘時錢鏐方得兩浙置之幕府
使典軍中書檄其後官給事中初隱罷上中書之日費
窘因抵魏謁鄴王羅紹威將入其境先貽書敘其家世
鄴王為姪幕府僚吏見其書皆怒曰羅隱一布衣爾而
姪視大王其可乎紹威素重士且曰羅隱名振天下王
公大夫多為所薄今惠然肯顧其何以勝得在姪行爲
幸多矣敢不致恭諸公慎勿言于是擁旆郊迎一見即
拜隱亦不讓及將行紹威贈以百萬他物稱是仍致書

于鏐謂叔父鏐首用之曹唐郴州人少好道爲大小
遊仙詩各百篇又著紫府立珠一卷皆敘三清十極紀
勝之事其遊仙之句則有漢武帝宴西王母詩云花影
暗回三殿月樹聲深鎖九門霜又云樹底有天春寂寂
人間無路月茫茫皆爲士林所稱其後遊信州館于開
元寺三學院一旦臥疾衆僧忽見二青衣緩步而至且
四向顧視相謂曰祇此便是樹底有天春寂寂人間無
路月茫茫言訖直入唐之臥室衆僧驚異亦隨之而入
踰闕而青衣不復見但見唐已殂矣先時唐與羅隱相
遇隱有題牡丹詩云若教解語應傾國任是無情亦動
人唐因戲隱曰此非賦牡丹乃題女子障耳隱應聲曰
猶勝足下鬼詩唐曰其詞安在隱曰只樹底有天春寂
寂人間無路月茫茫得非鬼詩唐無言以對至是
青衣亦援引此句而唐尋卒則唐之言豈偶然哉

仇殷不知何郡人也開平中仕至欽天監明于象緯歷

數藝術精密近無其比光化中太祖在滑遣密王友倫

以兵三萬禦幽州之師十餘萬深慮其不敵召殷問曰

陣可行乎曰其十四日過禹中乎又問之曰賊敗塗地
又曰既望當見捷書果如其言不失晷刻太祖之在長
蘆也諸將請攻壁號令軍中人負藁二圍寘千積俄而
雲集殷曰何用或以所謀告之殷曰我占矣不見攻壁
象無乃自退乎翌日有騎馳報丁會以潞州叛太祖令
盡焚其藁而還不克攻開平中殷一日朝罷過崇政院
使敬翔直閣翔問之曰月犯房次星其逼若綴是何祥
也曰常度耳殷欲不言既過數步自度不可默乃反言
曰三兩日當有不順語至無或驟恐宜先白上知既二
日陝府奏同州劉知俊閉關作叛初王景仁之出師也

殷上言太陰虧不利深入太祖遽遣使止之已敗于柏

鄉矣

案北夢瑣言云柏鄉狼狽梁祖亦自咎曰違犯天道不取仇殷之言也薛史以爲太祖遽遣使止之

與北夢瑣言異

殷所見觸類如是不可備錄然而畏慎特甚居

常寢默未嘗敢顯言縱言事跡唯其語音不可盡曉以

故屢貽責罰後卒于官

永樂大典卷一萬四千八百四

段深不知何許人開平中以善醫待詔于翰林時太祖

抱疾久之其洩甚濁僧曉微侍藥有徵賜紫衣師號錫

賚甚厚頃之疾發曉微剥服色去師號因召深問曰疾

愈復作草藥不足恃也我左右粒石而效者眾矣服之

如何深對曰臣常奉詔診切陛下積憂勤失調護脈伐

乳而心益虛臣以爲宜先治心心和平而洩變清當進
飲劑而不當粒石也臣謹案太倉公傳日中熱不洩者
不可服石石性精悍有大毒凡餌毒藥如甲兵不得已
而用之非有危殆不可服也太祖善之令進飲劑疾稍
愈乃以幣帛賜之

永樂大典卷二
萬一千六百九

舊五代史卷二十四終

舊五代史卷二十四攷證

梁書列傳十四李珽傳河南有外黃小黃 小黃歐陽

史作下黃攷困學紀聞云五代通錄李珽曰河南有
外黃小黃漢地理志陳留有外黃小黃縣五代史記
改小黃爲下黃誤也當從通錄

秦有外黃都尉 都尉原本作郡尉今據漢書地理志
及歐陽史改正

充侍講學士 案歐陽史作侍講

盧曾傳始爲齊州防禦使朱瓊從事 案新唐書通錄

與是書梁紀皆稱朱瓊爲齊州刺史惟此傳作防禦

使疑有舛誤

孫騰傳並格殺于前墀 案通鑑攷異引梁實錄作賜
死通鑑作撲殺于前墀

杜荀鶴傳旬日而卒 案唐才子傳荀鶴以天祐元年
卒北夢瑣言作梁受禪後拜翰林學士五日而卒未
知孰是

羅隱傳羅隱餘杭人 案澗泉日記作新城人

舊五代史卷二十四攷證